

Mətakər Anə Yahwana

Səra Tsəfə Kau Ar Kəri

¹ Mətakər sara ara Yesu Kərsiti, kəra Hyal nə nyi aga ja canə nyi anə njir məl thlər nyi'yar, səra dər ləhəu kəl ju nda nyabiya dzau. Ji cabiya sə kau ar babal lagura ji səwa waladi nyi anə ndər məl thlər nyi Yahwana.

² Yahwana ləri sakida ar kəra kalar səra ji lari, naja ngə, ndər Hyal ənga sakida kəra Yesu Kərsiti ləri.

³ Barka anə ndər jiga ndərhaha sara ara Hyal kau, ənga barka anə njira nggari ba ndə fuwa wu dəfuwa nda səra tsətsəfau, ara pəcir nyabiya dzər nda patə a dəri ləhəu.

Usa Dzau Anə Daḅə Dzər Njir Nu'yar Wu Məlmə Pampaməu Mədəfau

⁴ Nayi, Yahwana, ngə ləri tsəfə kau, anə daḅə dzə njir nu wu məlmə paməpamə mədəfau wu 'yi'yir Asəya.

Mayiwakur ənga nggya jaməkur sara ara Hyal ja nggya ənga hyi, Hyal ndəra a'yi əshina, ənga saya də, ənga ndəra wu nda shili, ba sara ara mambəl paməpamə mədəfau kəra a vər nggya wu mwar tsəkafə nə Hyal.

⁵ Ənga sara ara Yesu Kərsiti ndəra naja ngə fər kər nə jijiri, ndər lə sakida, ja nggya ənga hyi, naja ngə ndə nə tanggərma kəra hya'ari sara vir tau, ənga ndər səm təlkur ar kəra təltəl'yar nə duniya.

Naja ndəra cabiya mən yiwukur, ənga ndəra kətiya mən sara wu mafakur nə bikər mən lagur pəna mashi nyi.

⁶ Naja ngə məliya mən, mən də dabə njir səm təlkur ənga pubu'yar, njir məl thlər anə Hyal ənga anə Dənyi. Anə nyi ngə kadakadarkur ənga dənəma ba'anəwa. Amina.

⁷ Tsama mau, kəja ju shili wu dlama sara dəməlməu.

Kalar ndapi wu nda lar nyi,
patə əkkə'yi njira tsatsaviya nyi ənga katsakər.

Ənga patəkura njir duniya wu nda tiwi arya ja.

Ənga jiri, abangə nga nyi wu nda də. Amina.

⁸ Əngwar Hyal Thlagəu, “Nayi ngə Dzəgwa, nayi ngə Kudīya. Nayi ngə ndəra a'yi əshina, ənga saya də, ənga ndəra wu bəra nda sha shili, Ndə dəgal dənəma.”

Mətakər Ar Kəra Kərsiti

⁹ Nayi Yahwana, zamər hyi, kəra wu cir zəmə əkkə'yi hyi wu sa bwaḃwatəu, ənga wu təlkur Hyal, ba ənga wu mba dəfu kəra nər mən wu Kərsiti Yesu. Nji kədləna də a gwar dzəgur dəl nə Patəmosu arya ndər Hyal kəra yi tətəlna ənga sakida kəra yi ləri ar kəra Yesu.

¹⁰ Ar pəci nə Thlagəu, ənggəra Mambəl shida ar kəra yau, ba yi nggari dəhəu dəgal wu yukudə də ənggər mbidə tələmə,

¹¹ kəra a vər na, “Tsəfəya ar ləkakadəu, sərə gə ləri ba ga səwa nyi anə daḃə dzə nə njir nu'yar mədəfau, kəra wu məlmə Afisa, ənga Səməna, ənga Pagamusu, ənga Tayatəra, ənga Sardisu, ənga Filadelfiya, ba ənga Lawudekiya.”

¹² Ba yi shabiya dzau aga ya lari ndəra vər ndər anə də. Ayukudə yi shabiya dzau, ba yi lari sər səbə pitəlla nə əndzau mədəfau.

¹³ A gwar hada sər səbə pitəlla paməpamə mədəfə kau, ba yi lari vanyi ndau kəra a papa Zər Ndau, ji hari ləgutə kəra wu gya hadiya hiya ja sərəpəu, ənga ji thla'ubiya hathla ja ənga takulagə nə əndzau.

¹⁴ Kəra ja ənga shishir kəra ja a dər pərtə pwahəu ənggər əpur pa'wa, pərtə pwahəu ənggər mətəndili. Liya ja tsu wu mbəl dəgə kiyara u'u.

¹⁵ Hiya ja wu mbəl ənggər liyangə shishi'wu kəra nji nənə wu thla, ənga dəha ja wu pa tsəkir shidar dəl.

¹⁶ Ji səbiya shashilga mədəfau wu tsi mazəma ja, ənga sara vu miya ja ngə katsakər cacadə miya wu biya. Bama ja tsu wu mbəl ənggər mbəl nə pəci ma pəci ta'yi kər.

¹⁷ Ta yi lari nyi, ba yi dla a gyu hudə nyi ənggər ndəra tətəu. Kə ji fər tsi mazəma ja a dər yau, ji na anə də, “Ga sara hivər mai, nayi ngə tanggərma ənga nayi ngə kudiya.

¹⁸ Nayi ngə ndəra ənga pi. Nayi ngə ndəra tau, ama kəja yi ənga pi nə ba'anuwa. Nayi ngə ənga dənəma ar kəra tau, ənga ar kəra ki nə nji gə mambəl.

¹⁹ Ga tsəfəri kalar sərə gə lari, sərə a'yi a vər də kabəngəkəu, ənga sərə wu nggura də a ndu mwa.

²⁰ Kəja sərə dədəwa ar kəra shashilga'yar mədəfə kəra gə lari wu tsi mazəma yau, ənga sər jigə pitəlla nə əndzə mədəfə ta aga nyi: Shashilga'yar mədəfau, nanda ngə waladi'yar nə dəbə dzə njir nu'yar, wu məlmə paməpamə mədəfau ənga sər səbə pitəlla

mədəfau, ca ngə dabə dzə njir nu'yar wu məlmə paməpamə mədəfau.

2

Cama Anə Dabə Dzə Njir Nu Wu Məlmə Afisa

¹ “Ga tsəfəri cama tsətsəfə kə anə waladi nə dabə dzə njir nu wu məlmə Afisa , abər,

“Kəja cama sara ara ndəra səbiya shashilga'yar mədəfau wu tsi mazəma ja, ənga naja kəra a vər dəu wu pama sər jigə pitəlla nə əndzə mədəfau kə nana.

² “Wu səni yi sər mələ gə patəu. A lari yi kwakwadəkura gu thlər kəra ga vər məl, ənga dəwadətə kəra ga vər səsə'wau. Yu səni abər nəgə wu tsamə nji dəmwə'yi ənga li mai. Ənga gu tsam-biya njira wu ngga kərnda cama səsau ama a'yi nda abangə mai. Ənga a sənbiyar gau, abər nə fati nga nda.

³ A sən yau abər a nggyar gə ənga mba dəfu, ənga səsə'wu dəwadətəu gəra ənga hədə arya thləmə də.

⁴ Ama kəja sərə yi vazəya ngə ni, a piyari gə yiwukur kəra a'yi ara gə tsu kadəu.

⁵ Ga dəngari ənggəra gə dədəməu divira ga dla a gyu yukudu! Ga tubi sara ara bikə ngau, ga dumwa ənga məl sərə ga vər məl mənəhə dədəmə ta. Ma a'yi gə tubi mai, yu shida, ba ya sa həna sər jigə pitəlla nə ngau ar vir nggya nyi.

⁶ Ama kəja sər mələ gə kəra mənəhəu, gə piyari sər mələ njir Nikolayitanu, ənggər kəra yi piyari tsu.

⁷ “Kalar ndəra ənga himi ngga sau, kəl ja səya himi ja nggari sərə Mambəl a vər na anə dabə dzə njir nu'yar. Anə kalar ndəra səmku təlkur, yu nda nə

nyi dənama nə səm yayar wu nə pi kəra ar wu nə pi ar fa wu nə Hyal.

Cama Anə Dabə Dzə Njir Nu Kəra Wu Məlmə Səmərna

⁸ “Ga tsəfəri cama tsətsəfə kə anə waladi nə dabə dzə njir nu wu məlmə Səmərna abər,

“Kəja cama sara ara ndəra tanggərma ənga kudiya, ndəra tau ba ji bəra də a'yi ənga pi.

⁹ Yu səni bwaḃwatə ngau ənga gha ngau, ama ndə dudur nga gau! Yu səni culi ndər dida vi kəra wu biya sara wu miya njira wu ngga kərnda njir Yahudiya nji dədəm nə Hyal, ama a'yi nda abangə mai, ama dabə dzər nda, dabə dzə nə Shatan ngau.

¹⁰ Ga sara hivər arya culi bwaḃwatə kəra gu nda sa mai. Yu nar ngau, shatan wu nda sa vakuwa alenyi nju pama hyi a gwu fursəna, aga nja dzəbiya hyi. Hyu nda lari bwaḃwatə nə pida kumou. Ama ma hyi sən cinapi, hya nggya ənga fər kər wu mbərsar hyi, alaga ji dla ənga tau, nayi tsu, yu nə hyi dara təlkur nə pi.

¹¹ “Kalar ndəra ənga himi ngga sau, kəl ja səya himi ja nggari səra Mambəl a vər na anə dabə dzə njir nu'yar. Kalar ndəra səmku təlkur, naju lar bwaḃwatə ara tə nə məthləkura nyi mai.

Cama Anə Dabə Njir Nu Kəra Wu Məlmə Paga-mamu

¹² “Ga tsəfəri cama tsətsəfə kə anə waladi nə dabə dzə njir nu wu məlmə Pagamusu abər,

“Kəja cama sara ara ndəra ənga katsakər cacadə miya wu tsa ja.

¹³ Yu səni abər vira ga vər nggya a gwa, vira Shatan a vər səm təlkur nyi ari ngau. Alaga abangau, kə gə səbiya də ənga jirkur. Nagə a'yi shin də yi lagur mbərsa ngə mai, alaga ar pəci kəra nji tsəya Antipas wu pama hyi, ndəra lər sakida tsa'a miya dəfu ar kəra yau, ar vira Shatan wu nggya.

¹⁴ Alaga abangau, alenyi sə a'yi kəra yi vaziya ngau a gwa. Alenyi nji a'yi wu pama hyi kəra səbiya highiḃə nə Balamu, naja ngə ndəra highiḃər nyi anə Balakəu lagura ja məliya njir Izirayila nda məliya bikə ari, lagur səm sər səm kəra nji thlana anə katəu, ənga məl səsukur.

¹⁵ Abangə tsu a'yi hyi ənga njira səbiya highiḃə nə Nikolayitanu.

¹⁶ Agabangau, kəl ga tubi! Ma a'yi abangə mai, kəja yu shili ara gau ənga kusa, ba ya sa pana nda ənga katsakər kəra wu biya sara wu miya yau.

¹⁷ Kalar ndəra ənga himi ngga sau, kəl ja səya himi ja nggari sərə Mambəl a vər na anə dəḃə dzə njir nu'yar. Anə kalar ndəra səmku təlkur, yu nə nyi sara wu mana kəra dədəwa sara dəməlmau. Ənga tsu, yu nda nə nyi tsəka pərtəu kəra thləmə mafəliyangə tsətsəfau ari, kəra kəl ndəra dləwuri tsəka nyi ngu nggabiya wacu.

Cama Anə Daḃə Dzə Njir Nu Wu Məlmə Tayatəra

¹⁸ “Ga tsəfəri cama tsətsəfə kə anə waladi nə dəḃə dzə njir nu wu məlmə Tayatəra abər,

“Kəja cama sara ara Zər Hyal, Ndəra ənga liya ja ənggər kyara u'u, ənga hiya ja tsu ənggər liyangə kəra nji nəna wu thla.

¹⁹ Yu səni sərə məla gau, ənga yiwukur ngau, ənga mbərsa ngau. Yu səni dləwa dzə ngau ənga

səsə'wu sə ngau. Yu səni tsu abər sər məl ngə nə kabangəkau a ndiya ta dədəməu.

²⁰ Alaga abangau, kəja sər vazə ngə kəra a'yi. Nagau, gə nə nyi lagu anə mala kəra nja ngga ənga Jazabelu, mala kəra wu ngga kərnyi ənga nabi mala. Lagur highiḅə nyi, ji məliya njir məl thlər də'yar gu məl səsukur ənga səm sər səm kəra nji thlana anə katəu.

²¹ Yi nə nyi pəci aga ja tubi sara ara səsukur nyi, ama kə ji nggəl ara piyari səsukur nyi.

²² Agabangau, yu nda nə nyi shiləgə dəmwa 'yi gagaḁau, ənga kalar njira məl səsukur ənga ja, ndu nda lari ḅwaḅwatə gagaḁau. Yu nda məl anə nda abangau, ma ndə nggəl ara tubi nda piyari sər məla ja.

²³ Yu nda dləna wazha nyi. Daḅər njir nu patə wu nda sənbiya abər nayi ngə ndəra wu səni səra wu dəfuwa ndau, ənga səra ndu dənga patəu. Yu nda kina nyi anə kalar ndau tsa'a ənga sər məla ja.

²⁴ “Ama tsu ya 'yi ənga cama anə hyi, nahyi njira hiyau wu Tayatəra, nahyi kəra gəra nu highiḅə fati kau, ənga nu sə Shatan kəra ndu ngga ‘Sə Shatan kəra dədəwa.’ Tsu yu ḅəra cakə ḅwaḅwatə gagaḁə anə hyi mai.

²⁵ Səra a'yi, kəl hya səḁiya mbərsar hyi ḁaḁalu, kəl nayi ḅəra sha shili.

²⁶ Anə patər njira səmku təlkur, ənga ndə ḅəlari ndər də ba'anə kuḁiya, yu nə nda dənama sara ara dədə ar kəra njir duniya patəu.

²⁷ “Nji wu nda səm təlkur ar kəra njir duniya ənga zəwa liyangəu, ənga nju nda pəpəthləna nda ənggər təm kəra

nji həriya sara wu tsəkwabəu.

²⁸ Ndu nda da ənga dənama nə səbə nji ənggər kəra yi dləwuri sara ara dəda, yu bəra nə nda shashilga nə mudlau.

²⁹ Kalar ndəra ənga himi ngga sau, kəl ja səya himi ja nggari səra Mambəl a vər na anə dabə dzə njir nu'yar."

3

Cama Anə Dabə Dzə Njir Nu Wu Məlmə Sadisu

¹ "Ga tsəfəri cama tsətsəfə kə anə waladi nə dabə dzə njir nu wu məlmə Sardisu abər, kəja cama sara ara ndəra səbiya mambəl 'yar nə Hyal mədəfau, ənga shashilga paməpamə mədəfau. Yu səni sər mələ gə papatəu, gu tsamə kərngau ənggər ndə mbəmbədə nga gau, ama kəja tətə nga gau.

² Ga hya'ari sara wu ghanyi! Ga nərdzau aga ga ta'yibiya səra hyi kushu divira ja tau. A sənbiyar yau abər sər mələ gau, a'yi tsa'a wu mwar Hyal da mai.

³ Agabangau, ga dəngari səra gə nggari ənga səra gə hənggəri əni tanggərma, ba ga bəlari ənga ga tubi. Ama ma nagə a'yi hya'ari wu ghanyi mai, yu shili ənggər nəder həl kukuthləu, nagə wu nda səni pəci kəra yu nda shili ar mai."

⁴ Alaga abangau, a'yi gə ənga alenyi nji kəra wu dabə dzə njir nu nə Sardisu kəra gəra dəbəna kar har nda. Ndu nda bəu əkkə'yi yau wu kar pərtəu, arya a dəar nda tsa'a aga nyi.

⁵ Patər njira səmku təlkur yu nda har nda kar pərtəu. Ənggəra ji da patəu, nayu həbiya thləmər nda wu ləkakadə nə pi mai, ama yu nda hə'una nda

wu mwar dədə əkkə'yi waladi nyi'yar abər nədə
nga nda.

⁶ Kalar ndəra ənga himi ngga sau, kəl ja səya
himi ja nggari səra Mambəl a vər na anə dabə dzə
njir nu'yar.

*Cama Anə Dabə Dzə Njir Nu Wu Məlmə
Filadelfiya*

⁷ “Ga tsəfəri cama tsətsəfə kə anə waladi nə dabə
dzə njir nu wu məlmə Filadelfiya abər, kəja cama
sara ara ndəra cicau ənga jiri ndəra ənga sər pahə
miya ki nə Dawuda. Səra ji pahəna ndər hədiya a'yi
mai, ba tsu səra ji hədiya, ndər sən pahəna a'yi mai.

⁸ Wu səni yi sər mələ gə patəu, kəja ya pahənari
miya ki kəra ndər sən hədiya a'yi mai. Yu səni
dənama ngau tətəwa nga nyi, ama alaga abangau,
kə gə bəlari ndər də, nagə a'yi shin də yi mai.

⁹ Lara mau, yu nda ciwa kabə njir nu Shatan,
nda sa bəliya undi wu mwa ngau, ənga ya məliya
nda, nda sənbiya abər nagə ngə ndəra yu yiwu,
nanda njir thla fati, njira wu ngga kərnda njir
Yahudiya ama a'yi nda abangə mai.”

¹⁰ Arya gə bəlari dladə də nə capi, yu nda sa
kətiya ngau sara ara madiya pəcir dzə kəra a vər
shili ar kəra duniya patə aga sa dzə njira wu
duniya.

¹¹ Yu shili gəra ənga səkari. Ga səbiya səra ara
gau ɓaɓalu, ara nja sara mbəliya akkəri ngau.

¹² Kalar ndəra səmku təlkur, yu məliya nyi
aga shimal nə Ki Hyal də, naja bəra biya sara a
gwa mai. Yu nda tsəfəya ar ja thləmə Hyal də,
ənga thləmə məlmə Hyal də, naja ngə Urshalima
məfəliyangə kəra wu shida sara də məlmau sara

dara Hyal də, ənga tsu yu tsəfəri ar ja thləmə də kəra mafəliyəngəu.

¹³ Kalar ndəra ənga himi ngga sau, kəl ja səya himi ja nggari səra Mambəl a vər na anə daḃə dzə njir nu'yar.

Cama Tsətsəfau Anə Daḃə Dzə Njir Nu Wu Məlmə Lawudekiya

¹⁴ Ga tsəfəri cama tsətsəfə kə anə waladi nə daḃə dzə njir nu wu məlmə Lawudekiya abər,

“Cama kau, sara ara ndəra naja ngə Amina, ndəra naja ngə fər kər ənga sakida nə jijiri ənga ndər səm təlkur nə Hyal kəra məliya kalar sau.

¹⁵ Yu səni sər mələ gau, nagə a'yi gə shishi'wu mai, ya, a'yi gə kwakwadə tsu mai. Cimə də ga kyaga də pathləu wu pama nyi!

¹⁶ Ama kə gə də məmələməu, kəra a'yi gə shishi'wu mai, ənga a'yi gə kwakwadə tsu mai, agabəngau, yu təfəbiya ngau sara wu miya yau!

¹⁷ Ara gu na, ‘Nayi ndər bərba ngau ənga a'yi yau ənga kalar səra yu yiwu.’ Ama nagə wu səni abər ndə dəfəli nga gə mai, ndə gəra ənga sə dur. Nagə sər təhudu, ndə ləfau, ənga ndə turusu.

¹⁸ Agabəngau, yu nər ngə hangə aga ga dəlbiya əndzau sara ara yau, əndzə kəra nji thləna wu u'u aga ga də ndər bərba. Ənga tsu ga dəlbiya ləgutə pərtə nə ha sara ara yau, aga ga mbuya turusukur ngau əni, ara ga sara gu səli. Ətsu ga dəlbiya mal pə wu li aga ga daḃəga lar sau mənahəu.

¹⁹ Patəkura njira yu yiwu, yu kughiya nda ənga yu hwathliya nda. Agabəngau, ga nərdzə ga məl səra tsa'a ənga jiri ba ga tubi.

²⁰ Səya mə himi! Kəja yi ta'yi a miya ki ya vər tsa. Kalar ndəra nggari daha yau, ba ji pahəna miya ki, yu vwau ya vuwa nggya wu ja, ba 'ya səm sər səm ənga ja.

²¹ Kalar ndəra səmku təlkur, ju nda nggya ənga yau ar tsəkafə də, ənggər kəra yi səmku təlkur ya vər nggya ənga dədə ar tsəkafə nyi.

²² Kalar ndəra ənga himi ngga sau, kəl ja səya himi ja nggari səra Mambəl a vər na anə dəbə dzə njir nu'yar."

4

Dləvau A Dəməlmau

¹ Ayukuda kau, ba yi tsamə, ba yi lari vanyi miya ki papahau a dəməlmau. Dahə ta yi saya nggari ənggər mbidə tələmə ta, ənga yi bəra nggari ja vər ndər anə də, ju na, "Shida ənggau, ba ya sa canə ngə səra kəl ji darkər ayukuda kau."

² Ənggərna ba Mambəl shida ar kəra yau, ba yi lari tsəkafə a dəməlmau ənga vanyi ndau a vər nggya ari.

³ Ndəra vər nggya a dar tsəkafə kau, ju mbəl ənggər tsəka dəzə mənəhəu, kəra nja ngga ənga jaspə ba karneliyanu. Mbəmbəl shamba kəra zəwuya tsəkafə kau, a ya pata tsəka kəra wu mbəl ənggər səkwər kwa.

⁴ Tsəkafə paməpamə məthləkumunyi apə fodə ngə zəwari nyi, ənga njira nggurəm məthləkumunyi apə fwahəu nga vər nggya ar nda. Ndə bathlər dzau ənga kar pərtəu ənga dara təlkur nə əndə ngu kəra nda patəu.

⁵ Sara ar tsəkafə kə ngə səm par wu biya ənga dəraghi par ba dlədə par. A dumwar tsəkafə kau,

təsə u'u mədəfau a'yi a vər mbəl. Nanda ngə mambəl paməpamə mədəfau nə Hyal.

⁶ A dumwar tsəkafə kau, vanyi sə a'yi kəra ənggər dəl məshi'wa, kəra wu mbəl wilwilu ənggər tsəka pərtəu.

A vwar hada ba zəwuya tsəkafə kau, ngə sə ənga pi fodəu. Li ngə sa nda hədiya nda a dumwa ənga a biyu yukufu.

⁷ Sə nə tanggərma wu sə ənga pi fodə kau, a ya pata ləvari, nə məthləkura nyi a ya pata thla zəwa, ənga nə makərkura nyi a pa bama ndau, ba nə fodəkura nyi tsu a ya pata dəgumbəla kəra a vər mau.

⁸ Kalar zəma sə ənga pi fodə kau, a'yi nda ənga bəgə kwa kwa ba li ngə zəwar nda patəu, a vu hudəu ənga a biyar ya nda. Vu'yi ənga pəci nga ndu dumwa ndu na,

“Ndə cicau, ndə cicau, ndə cicau
ngə Hyal Thlagəu ndə dəgal dənama!
Ndəra a'yi ja dədəməu, a'yi ja kabangəkau,
ənga ju bəra nda shili.”

⁹ Kalar pəci kəra sə'yar kə ənga pi kə lə kadakadarkur, ənga dəgalkur, ba ənga usaku anə ndəra vər nggya ar tsəkafə kau, ndəra a'yi ənga pi ba'anuwa,

¹⁰ nanda njira nggurəm məthləkumunyi apə fodə kau, wu bəliya undi wu hudə ndəra vər nggya ar tsəkafə kau, ndu dləvə nyi, ndəra a'yi ənga pi ba'anuwa. Ndu pina dara təlkur nda a dumwar tsəkafəu, ndu na,

¹¹ “Nagə ngə də tsa'a aga dləvə, Hyal Thlagər 'ya,

dləwuri kadakadarkur, ənga hakər, ba ənga
dənəma,
arya nagə ngə məliya patər sau,
ənga a'yi nda ənga pi ara nagə ngə məliya kalar
səra gu yiwu patəu.”

5

Ləkakadə Pəpədaŭ Ənga Zər Gaməu

¹ Kə yi lari ləkakadə pəpədaŭ wu tsi mazəma
ndəra vər nggya ar tsəkafə kau. Ləkakadə pəpədaŭ
kau, a'yi ja ənga tsəfaŭ a gwu huda nyi, ənga a biyar
ya nyi, kəra nji ghidəna miya nyi ənga mətsamə
ghighidaŭ mədəfaŭ.

² Kə yi lari vanyi madiya waladi, kəra hya'ana
dəhə dzədzəgaməu, ju hə'u sau, ju na, “Wa ngə də
tsa'a aga ja təkudəna mətsamə ghighidə nə ləkakadə
ka, ba ja pahəna?”

³ Ama ndə a'yi kəra də tsa'a a dəməlmaŭ ənga wu
duniya ba ənga wu ndəla 'yi'yi kəra wu sən pahəna
ləkakadə kə ənga ja tsamə səra a gwa gwa mai.

⁴ Kə yi tiwi ənga sələm gagaŭ ara ndə a'yi kəra
də tsa'a aga ja pahəna ləkakadə kau, ənga ja tsamiya
səra a gwa gwa mai.

⁵ Kə pathləu wu pama njira nggurəm
məthləkumunyi apə fodə kə na anə də, “Ga sara
tiwi mai! Lari, kəja Ləvari nə culi Yahuda, sara
wu nggilang nga Dawuda a səmkur təlkur. Naja
ngə ndəra də tsa'a aga ja pahəna ləkakadə kau ənga
mətsamə ghighidə mədəfə kau.”

⁶ Təma, kə yi lari vanyi zər gaməu, kəra ənggər
nji tsəya, ama kəja ta'yi nga ja wu pama tsəkafəu,
ənga sə ənga pi fodəu, ba ənga njira nggurəm

məthləkumunyi apə fodə kau. A'yi ja ənga tələmə mədəfau ənga li mədəfau, nanda nga ar viya mambəl Hyal mədəfə kau, kəra Hyal səwa a ndu huda duniya patəu.

⁷ Kə Zər Gamə kə hya'ari ji nda dləwuri ləkakadə pəpədə kau sara wu tsa mazəma ndəra vər nggya ar tsəkafə kau.

⁸ Ta ji dləwuri ləkakadə pəpədə kau, təma, kə sə ənga pi fodə kau, ənga njira nggurəm məthləkumunyi apə fodə kə bəliya undi wu mwar Zər Gamə kau. Kalar ndu pama nda a'yi ja ənga səmbəl, ənga ndu səbə tasa'wu əndzə nyinyau ənga sə kisəu, kəra ca ngə kədi Hyal nə nji cici gə Hyal.

⁹ Kə ndə thlə na mafəliyangə, ndu na,

“A dəri gə tsa'a ga dləwuri ləkakadə pəpədə kau
ga təkudəna mətsama nyi ənga ga pahəna.

Ara a tsəya ngər nji,
ənga mashi ngau,

nga gə bəliya nji anə Hyal,
sara wu kalar culi ənga miya ənga 'yi'yi nə
duniya pampaməu.

¹⁰ Kə gə shabiya nda, ndə də njir təlkur ənga
pubu'yar
njir məl thlər anə Hyalər mən.
Ənga ndu nda səm təlkur tsu ar kəra duniya.”

¹¹ Kə yi tsamə ba yi nggar dəha waladi'yar kəra
ndiya dubu duburam tata'yi kəra zəwari tsəkafə
kau, ənga sə ənga pi fodə ta, ba njira nggurəm
məthləkumunyi apə fodə ta.

¹² Ənga ndu thlə na, ndu na,

“Zər gamə kəra nji tsəya a dəri tsa'a ja dləwuri
 dənama ənga bərbakur,
 ənga hahangəkur, ənga nərdzau, ənga dəgalkur,
 ənga kadakadarkur ba fal!”

¹³ Təma, kə yi nggari kalar sə kəra ənga pi a
 dəməlmau ənga kəra a gyiwu 'yi, ba kəra a gyu ndəla
 'yi'yi ba ənga kəra a gwu dəl, patəkura səra ənga nda
 vər thlə miya, ndu na,

“Fal, ənga dəgalkur ənga kadakadarkur ba dənama
 a nggyari anə ndəra vər nggya ar tsəkafə nə
 təlkur
 ənga tsu anə Zər Gamə ba'anuwa!”

¹⁴ Kə sə ənga pi fodə kə dləwubiya, ndə na, “Amina!”
 Kə njira nggurəm məthləkumunyi apə fodə kə bəliya
 undi ndu dləvə nyi.

6

Zər Gamə Təkudəna Mətsamə Ghighidau Nə Ləkakadau

¹ Kə yi lari Zər Gamə təkudəna pathlə wu pama
 mətsamə ghighidə mədəfə ta, ba yi nggari pathlə
 wu pama sə ənga pi fodə ta a vər na, ənga dəhə
 dlabəu kəra ənggər dlədau, wu na, “Ba shili!”

² Ta yi tsamə, ba yi lari vanyi tagu pərtəu. Ndəra
 a dari səbiya laga wu tsa ja, kə nji nə nyi dara nə
 təlkur. Ji biya ənggər ndəra səmku təlkur aga ja biya
 səmku təlkur.

³ Ta Zər Gamə təkudəna mətsamə ghighidə
 nə məthləkura nyi, ba yi nggari sə ənga pi nə

məthləkura nyi wu pama sə ənga pi 'yar ta, wu na, “Ba shili!”

⁴ Kə vanyi tagu səbiya, tagu dəzəu. Ndər dla nyi, nji nə nyi dənəma aga ja kar nggya jaməu wu duniya, ənga ja məliya nji, nda tsa kərnda. A nə nyir nji madiya katsakər.

⁵ Ta Zər Gamə təkudəna mətsamə ghighidə nə makərkura nyi, ba yi nggari sə ənga pi nə makərkura nyi wu pama sə ənga pi 'yar ta, wu na, “Ba shili!” Kə yi tsamə, təma, kə yi lari vanyi tagu kyakyaru! Ndər dlə tagu kau, ənga sər təkə sə bama ənga bama wu tsa ja.

⁶ Kə yi nggar vanyi sau, kəra wu pa dəhəu sara wu pama sə ənga pi fodə ta, wu na, “Tasa'wu təkə sə nə uhi pathləu nju nda dəl ənga gənna thlər nə pəkə pathləu. Tasa'wu təkə sə makər nə yedī nju nda dəl ənga gənna nə thlər pəkə pathləu. Ama hya sara ndzana mal zaitunu ənga 'yimir wur inabi mai.”

⁷ Ta Zər Gamə təkudəna mətsamə ghighidə nə fodəkura nyi, təma, kə yi nggari sə ənga pi nə fodəkura nyi wu pama sə pi 'yar ta, wu na, “Ba shili!”

⁸ Ənggəra yi tsamə, kəja vanyi tagu, pətəhulul! Ənga ndər dla nyi, thləmə nyi ca ngə tau, ənga vir nggya nji gə mambəl ngu nu nyi. Təma, kə nji nə nyi dənəma ar kəra cifə pathləu nə fodəkura duniya, aga ja dləna nda ənga katsakər ba wuḁau, ba ənga shiləgə paməpamə ənga sər tagəu.

⁹ Ta Zər Gamə təkudəna mətsamə ghighidə nə təfukura nyi, kə yi lari a vu gya kida bagadi kau, mambəl njira nji tsəya arya ndər Hyal ənga sakida kəra ndə ləri.

¹⁰ Kə ndə hya'ana dəhə gagaɗau, ndu na, “Hyal Thlagəu, ndə dəgal dənama, ndə cicaɗu ənga tsu ndə jiri, kəl a nuwa nga gu nda məl numa anə njir duniya, ənga ga məliya njira tsəya 'ya nda kina mashir 'ya?”

¹¹ Təma, kə nji nə nyi anə kalar ndu pama nda ləgutə pərtəu, kə nji nar nda aga nda səkari nə pəci kushu, kəl nji nyabiya gangəkura njir məl thlər kuvwar nda ənga zamər nda kəra nju nda tsəya ənggər kəra nji tsəya nda kə tsu.

¹² Ənggə tsu, təma, yi ləri Zər Gamə təkudəna mətsamə ghighidə nə kwakura nyi. Kə 'yi'yi kənggədər dzau, kə pəci də kiyakiyar sitəu ənggər nggusəmi, ba hya də dəzəu tsu ənggər mashi.

¹³ Shashilga'yar tətəɗau a gyiwu 'yi ənggər kəra yayar wur kanda wu pəpau a gyiwu 'yi tsu ndə gəra nau ma yambadə dədəgal sau.

¹⁴ Təma, kə nji pədəna dəməlmau, ənggər kəra nju pədə buci, ənga kə nji fa'ana kalar mau ənga dzəgur dəl ar vir nggyar nda.

¹⁵ Kə təltəl'yar nə duniya ənga njir səm təlkur, ənga njira nggurəm nə soja, ənga njir gənna, ba njir dənama, ənga mafa'yar ba ənga kambər nji dəwana kərnda wu thləthləl'yar ənga wu mə'yar.

¹⁶ Ndu ngga mə'yar ənga tsəka'yar ndu na anə nda, “Təda mau a gyar 'ya aga hya dəwana 'ya wu mwar ndəra vər nggya ar tsəkafə kau, ənga sara ara hudə ndzəndzə nə Zər Gamə kau.

¹⁷ Arya pəci dəgal nə hudə ndzəndzər nda a shiliri, wa nga sən nda səsə'wura?”

Nji Dubu Gharu Ənga Dubu Fwadə kumunyi Apə Fodəu

¹ Ayukuda sə'yar kau, təma, kə yi lari waladi'yar fodə tata'yi u ar hyaka duniya paməpamə fodəu, ba ndə kar yambadə ara sau wu duniya, ar 'yi'yi ənga ar dəl ənga alaga ar wu.

² Kə yi bəra lari vanyi waladi a vər shida sara wu səbiyar pəci kəra a'yi ənga mətəmə nə Hyal kəra ənga pi wu tsa ja. Ənga dəhə dəgal ji ngga waladi'yar ta fodəu, kəra nji nə nda dənəma nə lə bwaḡwatə anə duniya ənga dəl tsu.

³ Əngwar waladiya nji, “A sara hya lə bwaḡwatə anə duniya, ənga dəl ənga wu'yar kwatahə mai, kəl 'yi fər mətəmə ar hüdəma njir məl thlər anə Hyal.”

⁴ Kə yi nggari gangəkura njira nji fər nda mətəmə nə Hyal kau, nanda nji dubu gharu ənga dubu fodə kumunyi apə fodə ngau (144,000), sara wu culi kumo apə məthləu nə njir Izirayila.

⁵ Kəja ənggəra nji fər nda mətəmə kau,

sara wu culi nji gə Yahuda 12,000,
sara wu culi nji gə Rubenu 12,000,
sara wu culi nji gə Gadu 12,000,

⁶ sara wu culi nji gə Ashiru 12,000,
sara wu culi nji gə Nafətali 12,000,
sara wu culi nji gə Manasa 12,000,

⁷ sara wu culi nji gə Simiyanu 12,000,
sara wu culi nji gə Lawi 12,000,
sara wu culi nji gə Isaka 12,000,

⁸ sara wu culi nji gə Zabulanu 12,000,
sara wu culi nji gə Yusufu 12,000,
sara wu culi nji gə Benjamenu 12,000.

Daḅə Dzə Njir Nu Kəra Cicau

⁹ Ayukuda kau, təma, kə yi tsamə ba yi lari daḅə dzə nji cici gə Hyal gangə gagadau kəra nji gəra sən jigabiya. Ndə səbiya sara wu kalar culi ənga 'yi'yi ənga miya pampaməu, tata'yi nda wu mwar tsəkafəu, ba ənga wu mwar Zər Gamə kau. Ndə hari ləgutə pəpərtə patəu, ənga hyali hyifa ngu tsa nda.

¹⁰ Ndə hya'ana dəhəu dədəgaləu, ndu na,

“Mbəḁəu sara ara Hyalər mən,
ndəra vər nggya ar tsəkafə kau
ənga anə zər gama nyi!”

¹¹ Waladi'yar kə patə tata'yi nda, ndə zəwar tsəkafə kau, əkkə'yi njira nggurəm ba sə ənga pi fodə ta. Kə ndə dla a gyiwu 'yi wu mwar tsəkafə kau, ndu dləvə Hyal,

¹² ndu na,

“Amina! Fal, ənga hakər,
ənga hahangəkur, ənga usaku, ənga gənggər səli,
ənga dənəma, ənga dəgalkur
a nggyari anə Hyalər mən
ba'anəwa! Amina!”

¹³ Kə pathləu wu pama njira nggurəm kə yiwa də, ji na, “Nji mani ngə hari ləgutə pəpərtə ka? Ənga sara mani nga nda ətsu wa?”

¹⁴ Kə yi şadəwa nyi, yi na, “Maləmə, nagə ngu ndiya ənga səni.”

Kə ji na anə də, “Nanda ngə njira biya sara wu ḅwaḅwatə kəra kwakwadəu. Ndə cina ləgutər nda ənga mashi Zər Gamə kau, ba ji də pərtə pwahəu.

15 Ca ngə də,

“Ndə tata'yau, wu mwar tsəkafə Hyal,
ndu dləvə nyi vu'yi ənga pəci
wu ki Hyal.

Ənga ndəra vər nggya ar tsəkafə kə
wu nda mbuya nda əgyakidə kwapatə nyi.

16 Tsu ndu bəra ngga wu bə mai,
alaga hili mai.

Kwakwadəkər nə pəci wu nda mbəl a gyar kəra nda
mai,
ənga alaga kwakwadəkər nə vitəku mai.

17 Zər gamə kəra vwar hada tsəkafə kau,
ngu nda də ndər bəlar nda,

ja dzəgwa ləbiya nda a ndar vira ənga 'yimi mandəli
mbəmbədau nə lə pi gəra kudəu.

Hyal ngu nda dāna nda sələmər liya nda
patəu.”

8

Mətsamə Ghighidə Mədəfəkura Nyi

¹ Ta Zər Gamə təkudəna mətsamə ghighidə
mədəfəkura nyi kəra ar dar ləkakadə pəpədə kau, kə
vi də diyu a dəməlmə nə reta saka pathləu.

² Kə yi lari waladi'yar mədəfau kəra tata'yi wu
mwar Hyal, təma, kə nji nə nda tələmə nə mbidə
tugu mədəfau.

³ Vanyi waladi ənga kyi nə əndzau, ji shili ji sa
ta'yi wu mwar bagadi kau. Nji nə nyi sə kisəu
gangəu aga ja dəzə sau dəbə ənga kədi Hyal nə nji
cici gə Hyal patəu, a dar bagadi nə əndzə wu mwar
tsəkafəu.

⁴ 'Yar nə sə dədəzə kisə kau, dəbə ənga kədi Hyal nə nji cici gə Hyal hya'ari a dumwar Hyal, a dəməlmau sara wu tsa waladiya nyi.

⁵ Kə waladiya nyi hər kiya kau, təmə, kə ji nyana ənga u'u sara dar bagadi kau, ba ji dzəgwa vakana nyi a gyu duniya. Kə sə'yar kə hya'ari, dlədə par, ənga dəraghi par, ənga səm par, ba ənga kənggəder 'yi'yi.

Tələmə Tugu'yar

⁶ Kə waladi'yar kə mədəfau, ənga tələmə tugu'yar mədəfə pabər dzau, aga nda mbidiya mbidau.

⁷ Ta waladi nə tanggərma mbidiya nə nyi, kə mətəndili ənga u'u gwagwadə ənga mashi pəpau a shida wu duniya. Kə cifə pathləu wu makər nə duniya mbar u'u, ənga cifə pathləu wu makər nə wu'yar ənga sar'yar kəra kyakyaru nggyinakər tsu.

⁸ Ta waladi nə məthləkura nyi mbidiya nə nya tələmə tugu, kə sə tumu ənggər mau, kəra a mbar u'u, nji vakuwa a gwu dəl. Kə cifə pathləu wu makər nə 'yimir dəl sha aga mashi.

⁹ Kə cifə pathləu wu makər nə səra ənga pi a gwu dəl tənəkər patəu, ənga cifə pathləu wu makər nə kwambwal'yar kəra a gwar dəl kə ndzənəkər.

¹⁰ Ta waladi nə makərkura nyi mbidiya nə nyi tələmə tugu, kə madiya shashilga kəra wu mbəl ənggər u'u təsəu, tədəu sara a dəməlmau a gyar cifə pathləu wu makər nə 'yimir dəl ənga 'yimi kəra wu ndəla sara gyu 'yi.

¹¹ Thləmə shashilga kau, ca ngə mədəwatəu. Kə ji shabiya cifə pathləu wu makər nə 'yimir dəl da

dəwatəu, ba nji gangə kəra təwar 'yimi kə tənəkər ara dəwatəkura nyi.

¹² Ta waladi nə fodəkura nyi mbidiya nə nyi tələmə tugu, kə cifə pathlə wu makər nə pəci, ənga hya, ba shashilga'yar jibar dzau, kəta cifə pathləu wu makər nə mbəmbələr nda sha aga kuthləu. Mbəmbəl nə cifə pathləu wu makər nə puci a'yi mai, abangə tsu ngə vu'yi.

¹³ Ənggəra yi tsamə sau, ba yi nggari vanyi dəgumbəla kəra a vər mau a dar hada mələmau wu ngga ənga dəhə dədəgal, ju na, “Sər Təhudəu! Sər Təhudəu! Sər Təhudəu, anə njira vir nggya wu duniya ar pəci kəra waladi'yar kə makəru wu nda mbidə tələmə tukur nda kəra ndu yiwu nda mbidəu!”

9

Tələmə Tugu Nə Təfukura Nyi

¹ Ta waladi nə təfukura nyi mbidiya nə nyi tələmə tugu, ba yi lari shashilga kəra tədau sara dəmələmau a shida wu duniya. Ba nji nə nyi sər pahə miya ki nə ka'u dzəgamə gagadə kau.

² Kə shashilga nyi pahəna miya ka'u kəra nji gəra sən təkəna ta, kə 'yar biya sara a gwa ənggər 'yar kəra wu biya sara ar vir thlə təm kəra dəgal gagadəu. Pəci ənga dəmələmau hədiya dzau ənga kuthlə ara 'yar kəra a vər biya sara wu ka'u kəra nji gəra sən təkəna ta.

³ Sara wu 'yar ta, kə ndzəkwa shida a shida wu duniya, ənga nji nə nda dənəma nə da ənggər ədi 'yar.

⁴ Kə nji nar nda, abər nda sara lə ɓwaɓwatə anə sar ənga sə tsətsə'yar, ba wu'yar mai, ama kəl njira gəra ənga mətsamə nə Hyal ar hudəma nda.

⁵ Nji a'yi nə nda dənama nə tsa nji mai, ama aga nda takasəya nda wacu nə hya tufu. Ənga ɓwaɓwatə kəra ndə lari ənggər da ədi nga nyi, kəra dəya ndau.

⁶ Ar pəci kau, nju gal tau ama nandə wu uya mai. Ndu nda cim nda tau ama ba ta hwinakər ara nda.

⁷ Ndzəkwa nyi'yar ndu pa tagu kəra nji bathlər aga gwa pa. A dar kəra nda, ndə hari sə ənggər dara nə təlkur kəra nji məliya sara wu əndzau, bama nda tsu wu pa bama nji.

⁸ Shishir kəra nda ənggər shishir kəra mathləkə'yi nga nyi, ənga hira nda tsu ənggər hira ləvari nga nyi.

⁹ Nji hədiya hathla nda ənga ləgutə ha kəra nji məliya sara wu liyangə kyakyaru, ənga tsəkir ɓəga nda ənggər tsəkir tagu ənga keki tagu kəra a vər hwi a nda miya pa.

¹⁰ A'yi nda ənga shi'wu ənga hir da ənggər nə ədiyau, wu shi'wa nda dənama a'yi, nə lə ɓwaɓwatə anə nji nə hya tufu.

¹¹ A'yi nda ənga təl kəra wu səm təlkur ar kəra nda, naja ngə waladi nə ka'u dzəgamə gagadə ta, thləmə nyi wu miya njir Yahudiya ca ngə “Abadonu” ba ənga miya njir Gərikəu tsu ca ngə “Apoliyanu” kəra cabiya “Ndər Ndza Sau.”

¹² Sər təhudə nə tanggərma a tərabiyari, ama kəja tsu məthla nyi a vər shili.

Tələmə Tugu Nə Kwakura Nyi

13 Ta waladi nə kwakura nyi mbidiya nə nyi tələmə tugu, ba yi nggari dəhə a vər biya sara ar miya cira bagadi nə əndzə kəra wu mwar Hyal.

14 Kə dəhə kə na anə waladi nə kwakura nyi kau, “Pəlna waladi'yar kə fodə kau, kəra nji biya nda a gwar dəl dəgal nə Yifəratəsü.”

15 Təma, kə nji pəliya waladi'yar kə fodə kau, kəra nji pabəri nda aga najaka saka ənga najaka pəci, ənga najaka hya ənga tsu najaka fa aga nda dləna cifə pathləu wu makər nə ndapi.

16 Kəja soja'yar nə pa a dar ya tagu. A nar dəar nji gangəkura nda, a kari nda njir pa dubu duburam gharu məthləu.

17 Wu mətakər də, kə yi lari tagu ənga njir dlə nda, ndə hari ləgutə liyangə kəra dədəzəu, ənga kəra ənggər zaragina, ənga tsu kəra nənanəna. Kalar tagu kau, ənga kəra ja ənggər nə ləvari, ənga sara wu miya nda ngə u'u wu biya ənga 'yar ənga u'u pərtə pwahəu wu shuni.

18 Ənga sər kudə nji kə makər kau, ngə cifə pathləu wu makər nə ndapi kəra a'yi wu duniya ngə kudər nda sara ara, nanda ngə u'u ənga 'yar ba ənga u'u pərtə pwahəu wu shuni kəra wu biya sara wu miya nda.

19 Dənəma nə tagu'yar kau wu miya nda nga nyi ənga wu shi'wa nda. Shi'wa nda ənggər nə pabə'yar, kəra ənga kər kəra ndu lə ɔwaɔwatə anə nji əni.

20 Aleniyi ndapi kəra hiyau ara tau sara ara sər dlə nji ta, kə ndə nggəl ara tubi ara sər mələ nda. Nanda a'yi piyari dləvə mambəl dəmwə 'yi mai, ənga katə liyangə dəzər nda, ənga katə liyangə mbəl

wilwilu ənga liyangə kyakyaru, ba sara wu tsəka ənga wu mai. Nanda ngə katə'yar kəra gəra sən lar sau, ənga nggari ba gəra sən ɓau.

²¹ Nanda tsu a'yi tubi ara tsa ndə mai ənga səm dəshakur ba məl səsukur ənga həl sə ndə mai.

10

Waladi Ənga Zər Ləkakadə Pəpəɗau

¹ Kə yi ɓəra lari vanyi madiya waladi a vər shida sara dəməlmau, kəra dlama zəwar nyi, ənga shamba adabanga kəra ja. Bama ja ənggər pəci, hiya ja tsu ənggər shimal u'u.

² A'yi ja ənga zər ləkakadə pəpəɗau wu tsa ja kəra papahau. Kə ji fiya hi mazəma ja a gwar dəl ənga hi matsala ja ar 'yi'yi.

³ Ji səya mala wau kəra ma gə nggari dəgə abər nə ləvari. Ənga ənggəra ji wau, ba dlədə paməpamə mədəfə kə dləwubiya.

⁴ Ənggəra dlədə paməpamə mədəfə kə dləwubiya, yu yiwu ya tsəfəya, ama ba yi nggari ɗahə sara dəməlmə a vər na, “Ga hədiya səra dlədə mədəfə kə nana, ga sara tsəfə mai.”

⁵ Kə waladi ta yi lari ta'yi a gwar dəl ənga ar 'yi'yi ta har tsi mazəma ja a dəməlmau.

⁶ Ba ji səmku fəla ənga thləməər ndəra a'yi ba'anuwa, ndəra məliya dəməlmau ənga səra a gwa patəu, ənga duniya ənga səra a gwa patəu, ənga dəl ənga səra a gwa patəu, ji na, “Tsu vanyi sana pəci a'yi mai.

⁷ Ama ar pəci kəra waladi nə mədəfəkura nyi wu nda mbədə tələmə tugu nyi, səra a'yi ɗəɗəwa nə

Hyal wu nda nyabiya dzau ar babal, ənggər kəra ji nana, anə njir məl thlər nyi, nabi'yar.”

⁸ Kə dəhə ta yi saya nggar ta, sara dəməlmə ta, bəra ndər anə da wayu, ji na, “Ma'yi, ga gwa həri zər ləkakadə papahə ta, kəra wu tsa waladi ta, kəra a'yi ta'yi a gwar dəl ənga ar 'yi'yi.”

⁹ Təma, kə yi ma'yi a ndəgya waladiya nyi, yi nda yiwa aga ja nə da zər ləkakada nyi. Əngwar ja anə da, “Həri ba ga dəhu. Ju nda shabiya ta gau ja da dəwatəu, ama wu miya gau wu nda da nənəməu ənggər cidi.”

¹⁰ Kə yi dləwuri zər ləkakada nyi, sara wu tsa waladiya nyi, ba yi dəhu. Ta yi fuwa a du miya yau ba ji da nənəməu wu miya yau ənggər cidi, ama ta yi tasəya ba ji da dəwatəu a gyu ta yau.

¹¹ Kə nji nar da, “Kəl ya bəra habiya ndər ar kəra nji paməpamə gangəu, ənga 'yi'yi 'yi'yi paməpamə ənga miya paməpamə ba ənga təl təl pampaməu.”

11

Sakida Məthləu Nə Hyal

¹ Nji nə da zəwa təkə sau, kə nji na anə da, “Ma'yi ga nda təkəri ki Hyal ənga bagadi nyi, ba ga dzəgwa jigabiya njir dləvə kəra a gwa gwa.

² Ama ga sara təkə vi kəra a biyar ya ki Hyal mai, ga piyari, aya a nə nyir nji anə njira gəra sən Hyal. Ndu nda lər bəwəwatə anə məlmə cici nə Hyal nə hya fodə kumunyi apə məthləu.

³ Yu nda səwa sakida də'yar məthləu, njira har ləgutə sə'yinggu, yu nda nə nda dənəma nə habiya ndər nə pida dubu pathləu ənga gharu məthləu ənga kwakumunyi, ca ngə (1,260).”

4 Najaka njir lə sakida, nanda wur zaitunu məthləu ənga sər səbə pitəlla məthləu kəra a vər ta'yi wu mwar Thlagər duniya.

5 Kalar ndəra wu yiwu ja nə nda ɔwaɔwatəu, ba u'u a biya sara wu miya nda ba ja sana dawar nda 'yar. Abangə tsu ngə kalar ndəra wu yiwu ja nə nda ɔwaɔwatə wu nda tau.

6 Nji kə a'yi nda ənga dənəma nə hədə dəməlməu ara par a sara tədəu ar pəci kəra nda vər habiya ndər Hyal. A'yi nda ənga dənəma nə shəbiya 'yimi aga ja sha aga mashi ba aga nda lər u'u ar dza məlmə pəməpəmə gangəu ar kalar pəci kəra ndu yiwu.

7 Ayukudə ndə kudana lə sakidar nda, ba sər tagə kəra biya sara wu ka'u kəra nji gəra sən təkəna ta, ka sa pana nda. Ba ja səmku təkur ar kəra nda, ənga ja tsəya nda.

8 Nju nda piyari tətəkura nda ar babal wu huda məlmə kəra nji dlakəya Thlagər nda a gwa. Nju gəla najaka məlmə ənga Sodomu ba Masaru.

9 Nə pida makər ənga reta ngə nji sara wu kalar culi ənga miya ba ənga 'yi'yi wu nda tsamə dza nji tətə nyi ama nandə wu piyari nja hədəna nda mai.

10 Njira vər nggya wu duniya wu nda gu caguli ara tər sakida'yar kə məthləu kau. Ndu nda lə sə wu pəmə ara caguli, arya sakida'yar kə məthlə kau, a ləri nda ɔwaɔwatə gagadəu anə njira wu nggya wu duniya.

11 Ama ayukudə pida makər ənga reta, kə səpi nə lə pi shida sara ara Hyal, ba ji sa gwu nda, ba ndə hya'ari ar hiya nda, kə ndə ɔəra də a'yi ənga pi. Kə hivər mbar njira lar nda.

12 Kə sakida'yar kə məthlə kə nggari dāhə dədəgal sara dəməlmə wu na, “Shida mə ənggau!” Kə ndə ma'yi a dəməlmə wu dlama, wu liya dawar nda ndu tsamə nda.

13 Ar pəci kau, kə kənggədə nə 'yi'yi gagadə dərəkər, kə cifə pathləu nə kumo wu pama məlmə kə dlanakər. Nji dubu mədəfau ngə kudau arya kənggədər 'yi'yi kau, ba hivər mbar njira hyi mbəmbədau, ba ndə dzəgwa fal Hyal kəra a dəməlməu.

14 Sər təhudə nə məthləkura nyi a tərabiyari, kəja sər təhudə nə makərkura nyi a vər shili ənga kusa.

Tələmə Tugu Nə Mədəfəkura Nyi

15 Kə waladi nə mədəfəkura nyi mbidiya tələmə tugu nyi. Kə nji nggar dāhə dədəgal sara dəməlməu, a vər na,

“Təlkur nə duniya a dərī təlkur nə Thlagər mən ənga nə Kərsiti nyi,

ənga ju nda səm təlkur nyi ba'anuwa.”

16 Kə njira nggurəm məthləkumunyi apə fədəu, kəra a vər nggya ar tsəkafər nda a dumwar Hyal, ndə dla ar bama nda a gyu mwar Hyal, ndu dləvə nyi,

17 ndu na,

“Yu usa ngau, Hyal Thlagəu, ndə dəgal dənəma,

ndəra a'yi ənga ndəra saya də,

arya a həri gau dənəma ngau kəra dəgaləu,

ba gə dzəguya səm təlkur ngau.

18 Hudə njir duniya a ndzəri,

ənga hudə ndzəndzə ngau a shiliri.

Pəci a shiliri aga ga sa məl numa anə nji tətəu,

ənga ba ga dzəgwa lər akkəri anə njir məl thlər

ngau, nabi'yar,

ənga nji cici gə Hyal, ba njira vər gənggər səli anə
thləmə ngau,

nji yidədəu ənga nji nggunggurəm.

Pəci a shiliri aga ga dləna njira dləna duniya.”

¹⁹ Kə ki Hyal a dəməlmə pahəna dzau, a gwu ki Hyal kau, ba nji lar akwati alkawal mbamba nyi. Kə mbəmbəl səm par dəbə ənga dərəghi par, ba dlədə par ənga kənggəfər 'yi'yi ba madiya mətəndili.

12

Vanyi Mala Ənga Pabər Vuwa

¹ Kə nji lari vanyi madiya mətəsamə a dəməlməu, vanyi mala nji hədiya nyi ənga pəci, ənga hya a gyi gya kida hiya ja ənga dara təlkur nə shashilga kumou apə məthləu wu kəra ja.

² Mala kau ənga hudə nga ja, ja vər wau nə ya ara ar tsəkar ya nga ja.

³ Kə vanyi mətəsamə bəra cabiya dzau a dəməlməu, vanyi pabər vuwa, kəra dəzəu ənga kər mədəfau ba tələmə kumou ənga dara təlkur mədəfau wu kəra ja.

⁴ Kə shi'wa ja tsəkəna cifə pathləu wu makər nə shashilga kəra a dəməlməu, a gyiwu 'yi. Kə pabər vuwa ta ta'yi wu mwar mala hudə kau, aga ja tasəya zər nyi kau, ma ja yari.

⁵ Kə mala kə yabiya zər nyi, zər sal, naja ngu nda səm təlkur ar kəra njir duniya patə ənga zəwa liyangəu. Ama kə nji tsər zər nyi kau a dəməlməu a dəgya Hyal a dar tsəkafə nyi.

⁶ Kə mala kə hwinakər a ndar tagə mashi, vira Hyal pabəri nyi, vira nju nda nggya ənga ja nju bəla nyi nə pida 1,260.

⁷ Kə pa hya'ari a dəməlmau. Mayikalu ənga wal-
adi nyi'yar pana pa ənga pabər vuwa ta, kə pabər
vuwa ənga waladi nyi'yar pa ənga nda tsu.

⁸ Ama kə 'yi pabər vuwa a'yi nda ənga dənama
mai, kə nji səmku təlkur ar kəra nda, təma, ba ndə
tini vir nggyar nda a dəməlmau.

⁹ Kə nji vakana pabər vuwa ta a gyiwu 'yi, naja
ngə pabə dədəmə kəra nju ngga ənga təl shatan,
ba ənga Shatan, ndəra nggutana duniya patəu. Nji
vakana nyi a shida wu 'yi ənga waladi nyi'yar.

¹⁰ Kə yi nggari vanyi dəhə fwangə gagadəu sara
dəməlməu,

“Kabangəkəu mbədəu ənga dənama ənga təlkur nə
Hyalər mən a shidari,
ənga dənama təlkur nə Kərsiti nyi.

Ara ndər cudadu a miya ndəla zamər mən 'yar,
ndəra wu cudad ar kəra nda wu mwar Hyalər
mən vu'yi ənga puci,
a vakana nyir nji a gyiwu 'yi.

¹¹ Ndə ndiya dənama nyi
ənga mashi Zər Gamə
ba ənga ndər sakida kəra wu biya sara wu
miya nda,

nanda a'yi yiwu piya nda gagadə mai
nanda a'yi hwi ara tə mai.

¹² Agabəngəu, hya caguli nahyi kəra a dəməlmau
ənga nahyi njira wu nggya a dənə!
Ama sər təhudəu anə 'yi'yi ənga dəl,
arya shatan a gyar ja a gya ara hyi!

Nyinyi nga ja ənga dəfu arya ju səni abər pəci nyi
gusə nga nyi.”

¹³ Ta pabər vuwa ta lari abər a vakuwa nyir nji a shida wu duniya, təma kə ji kədlə mala ta yabiya zər sal ta.

¹⁴ Kə nji nə nyi bəgə məthləu nə madiya mbəmbələmə anə mala nyi, aga ja mau a dar vira nji pabər nyi a gwar tagə mashi, vira nju nda bəla nyi ari nə pəci ənga pəci'yar ba ənga reta pəci, ara pabə ta a sara tsəkwar nyi.

¹⁵ Sara vu miya pabər vuwa ta ngə 'yimi wu biya ənggər nə dəl, aga ja hər mala kau ənga dənəma aga ja ma'yi ənga ja.

¹⁶ Ama kə 'yi'yi dləwar mala kau, lagur pahəna miya ja təma, ba ji tasəya dəl kəra biya sara wu miya pabər vuwa ta.

¹⁷ Kə pabər vuwa ta nyabiya dzə ənga dəfu ar kəra mala kau, ba ji ma'yi, ji nda dzəgwa pa ənga alenyi culi mala kə patəu, njira wu bəlari dladə nə Hyal, ənga ndə səbiya sakida nə Yesu ənga jiri.

¹⁸ Ənggau kə pabər vuwa ta ta'yi ar məshi'wa nə miya dəla nyi.

13

Sər Tagəu Kəra Biya Sara Wu Dəl

¹ Kə yi lari sər tagəu a vər biya sara wu dəl. Sər tagə kau a'yi ja ənga tələmə kumou, ba ətsu ənga kər mədəfau. A'yi ja ənga dara təlkur kumou ar tələma nyi'yar, ənga ar kalar kər, sər dida thləmər Hyal a'yi ari.

² Sər tagə kəra yi lari kau, wu pa ufwa wula, ama a'yi ja ənga hi ənggər nə cimjigəl, ənga miya tsu ənggər miya ləvari. Pabər vuwa ta nə nyi dənəma nyi, ənga tsəkafə nyi ba ənga dənəma nə təlkur nyi.

³ Pathləu wu pama kəra sər tagə ta də ənggər ji uya mbəlgə nə tau, ama mbəlgə nə tə kau, ba shiləgəbiya dzau. Kə səkə də sə dədəgur anə duniya patə ba ndə dzəgwa nu sər tagə ta.

⁴ Nju gənggər nyi səli anə pabər vuwa ta, arya ji nə nyi dənəma anə sər tagə kau, ənga nji tsu ndə gənggər nyi səli anə sər tagə kau, ndu yiwa ndu na, “Wa ngə ənggər sər tagə ka? Wa nga sən pa ənga ja?”

⁵ Nji nə nyi miya anə sər tagəu, aga ndər nə ɓwadzau ənga ndər nə dida Hyal, ənga nji piyari nyi ja cə dənəma nyi nə hya fodə kumunyi apə məthləu.

⁶ Kə ji pahəna miya ja aga dida Hyal, ju dida thləmə Hyal ənga vir nggya Hyal ənga njira vər nggya a dəməlməu.

⁷ Nji nə nyi dənəma nə pa nji cici gə Hyal ənga ja səmku təlkur ar kəra nda. Kə nji nə nyi dənəma ar kəra kalar culi, ənga nji, ənga miya ba 'yi'yi pampaməu.

⁸ Patər njira wu duniya wu gənggər nyi səli anə sər tagə kau, kəl njira thləmə nda a'yi tsətsəfau divira duniya a dzəguya dzau wu ləkakadə pi nə Zər Gamə kəra nji thlana.

⁹ Ndəra ənga himi ngga bəgə ja nggari.

¹⁰ Ma ndəra wu kyaga də mafa,
mafakur nga ju nggya.

Ma ndəra nju kyaga tsəya nyi ənga katsakər,
ənga katsakər nga ju tau.

Culi sə'yar kau, wu yiwu nji cici gə Hyal nda nggya ənga səsə sau ba ənga mbərsa.

Sər Tagə Kəra Biya Sara Wu 'Yi'yi

¹¹ Kə yi 6əra lari vanyi sər tagəu kəra biya sara wu 'yi'yi. A'yi ja ənga tələmə məthləu ənggər nə Zər Gamə, ama ju ndər ənggər nə pabər vuwa ta.

¹² Ji məl thlər ənga patər dənəma nə təlkur nə sər tagə tanggərma ta anə nyi. Ənga ji məliya duniya ənga njira a gwa gənggər nyi səli anə sər tagə nə tanggərma ta, kəra mbəlgə nə tə nyi ta a şiləgəbiyar dzau.

¹³ Ji məliya madiya mətsamə gangəu, kəta ji məliya u'u a şida sara a dəməlmau wu liya nji patəu.

¹⁴ Arya dənəma kəra nji nə nyi aga məl mətsamə nə sə dədəgur kəra ji məliya ar viya sər tagə nə tanggərma ta, ba ji nggutana njira wu duniya. Ji ciwa nda aga nda həriya sərə a papa sər tagə ta nji uya nyi ənga mbəlgə nə katsakər ama naja a'yi tə mai ta aga nda gənggər nyi səli.

¹⁵ Nji nə nyi dənəma nə lə səpi anə sərə nji həriya kəra a papa sər tagə nə tanggərma ta, aga ja sən ndər, ənga ja tsəya patər njira nggəl ara gənggər nyi səli.

¹⁶ Naja tsu kə ji ciwa kalar ndau, ndə kushu ənga ndə dəgaləu, ndər gənna ənga ndəra gəra gənna, kambau ənga mafa, aga nda dləwuri mətsamə kau ar pəl mazəma nda ma a'yi mai ar hudəma nda.

¹⁷ Ji məl abangau ara ndə a sara dəlbiya ənga dəlna sau, kəl ndəra ənga mətsamə kau, ca ngə ndəliya thləmə sər tagə kau, ənga lamba nə thləmə nyi.

¹⁸ Sə kau wu yiwu hahangəkur. Ma ndə a'yi ənga sənbiya, bəgə ja jigəbiya lamba sər tagə kau, ara lamba nə ndəpi ngau, lamba kau, ca ngə 666.

14

Zər Gamə Ənga Nji 144,000

¹ Ta yi tsamau, ba yi lari Zər Gamə ta'yi ar mə nə Səhiyona. Ənga ja, nji a'yi, nji duburam gharu ənga duburam fodə kumunyi apə fodəu (144,000) kəra ənga thləmə nyi ənga thləmə dənəyi tsətsəfau ar hufəma nda.

² Kə yi nggari vanyi dəhə sara dəməlməu ənggər huhwir 'yimi ənga dlədər par. Dəha nyi a papa dəha səmbəl.

³ Nda vər thlə na məfəliyangəu a dumwar tsəkəfə Hyal ənga a dumwar sə ənga pi fodə kau ba ənga njira nggurəm məthləkumunyi apə fodə ta. Ndə a'yi kəra wu sən highiəri thlə na kə mai, kəl nji 144,000 kau, kəra Zər Gamə bəliya nda sara wu tsa duniya.

⁴ Nji ngau kəra gəra diyaəəna dza nda ənga zəwarkur, ndə nggya wu cicikur. Ndu nu Zər Gamə kalar vira ji mə'yi a ndari. A bəliya ndar nji, nanda ngə dəramwa kəra nju lə anə Hyal ənga nə Zər Gamə.

⁵ Fati a'yi wu miya nda mai, ənga nanda a'yi vavazə mai.

Waladi Makəru

⁶ Kə yi bəra lari vanyi waladi a vər mau a dəməlməu. A'yi ja ənga ndəshigu nə bə'anuwa kəra ju nda pəzau anə njira wu duniya. (Nanda ngə culi pampaməu, ənga miya pampaməu ənga nji pampaməu.)

⁷ Ji na ənga dəhə dzədzəgaməu, “Hya hivər Hyal ənga hya gənggər nyi səli, arya pəcir məl numa nyi a dəri. Dləvə nya mau ndəra məliya dəməlməu, ənga gyiwu 'yi, ənga tsadu ba ənga mändəli.”

⁸ Waladi nə məthləkura nyi nu nyi, ji sa na, “A dla ja! Madiya Babilanu a dlari, kəra məliya njir duniya nyabiya dzau wu səsukur nyi ənggər nyi padlau.”

⁹ Waladi nə makərkura nyi nu nda, kə ji na, ənga dəhə dzədzəgaməu, “Ma njira dləvə sər tagə kau, ənga sə a papa nyi kau, alaga njira dləwuri mətsamə nyi ar hudəma nda, ənga alaga ar tsa nda,

¹⁰ ju nda təwari 'yimir wur inabi nə hudə ndzəndzə nə Hyal, kəra nyinyau wu kyakiwa nə hudə ndzəndzə nə Hyal kəra əza'u. Nju nda nə nda bwaḃwatə nə u'ur kətsa kəra pərtə pwahəu wu shuni a dumwar waladi cici 'yar ənga Zər Gaməu.

¹¹ 'Yar nə u'u bwaḃwatər nda kau, hya'ari a dəməlmə ba'anuwa. Bəlsar a'yi ara njira wu dləvə sər tagə ənga sə kəra wu pa nyi vu'yi ənga pəci mai, alaga njira dləwuri mətsamə nə thləmə sər tagə kau.”

¹² Sə kau, a cabiyari abər nji cici gə Hyal, njira wu bəlar ndər Hyal ənga jirkur wu Yesu kəl nda nggya ənga mba dəfu.

¹³ Kə yi nggari vanyi dəhə sara də mələmau a vər na, “Tsəfəya, barka anə njira tə wu Thlagəu, mbar kabəngəkau.” Əngwar Mambəl Hyal, “Pakatəu, a nggyar nda njir barka, aya ndu nda uya bəlsar sara wu thlər kwakwadəkur nda, ara sər məla nda kəra mənəhəu wu nu nda.”

Pəcir Fa'a Sə Asi Nə Duniya

¹⁴ Ta yi tsamau, təma, kə yi lari a dumwa də dlama pərtəu, a du dlama kau, vanyi ndə a'yi kəra vir nggya “A papa Zər Ndau” ənga dora təlkur nə əndzə wu kəra ja ba məkalə səsəm wu tsa ja.

15 Kə vanyi waladi shida sara vu ki Hyal, ji sa ngga ndəra a'yi nggya wu dlama kau ənga dəhə dzədzəgaməu, “Həri məkalə ngau, ga fa'a sə əni, arya pəcir fa'a sə asi a dəri, ara sər duniya a nəri.”

16 Ndəra a'yi nggya a du dlama kau, kə ji sər məkalə nyi a shida wu duniya, kə ji kwafəri sə əni a di.

17 Kə vanyi waladi bəra biya tsu sara du ki Hyal kəra dəməlmau, ənga vanyi məkalə səsəmau, wu tsa ja.

18 Vanyi waladi tsu kəra dəgala gəra u'u biya sara dar bagadi, kə ji ngga ənga dəhə dzədzəgaməu, ndəra ənga məkalə səsəm ara ja kau, “Həri məkalə səsəm ngə kau, ga səri ga kwafəya yayar wu kəra dar wu'yar kəra wu duniya patəu, arya a nər nda.”

19 Kə waladi ta səwa məkalə nyi a shida wu duniya, kə ji kwafəya kalar yayar wur inabi 'yar nə duniya, kə ji tsəmiya nda a gwu vir bəci yayar wur inabi nə hufə ndzəndzə nə Hyal

20 Nji ghighirabəna yayar wa nyi a biyar ya məlmau, a biyar vir bəci yayar wur inabi, kə mashi biya sara wu nda, wu dzəgwa ndədə dzau a gwar tagəu, dzəgamkura nyi pa kəra tagu, ənga tugukura nyi tsu melu gharu ənga cisu kumunyi (180).

15

Waladi Mədəfau Ənga Bwaḃwatə Mədəfau

1 Kə yi lari vanyi madiya mətsamə a dəməlmau. Mətsamə kau, ca ngə waladi mədəfau ənga bwaḃwatə mədəfau. Bwaḃwatə kau, ca ngə nə jomə ndəl, arya ənga nda nga nju nda nyabiya hufə ndzəndzə nə Hyal.

² Təma, kə yi lari vanyi sə a papa tsadau kəra wu pa dəl kwalaba dadabə ənga u'u. Tata'yi a biyar ya tsadə kau, ngə njira səmku təlkur ar kəra sər tagə ta, ba sər papa nyi ba ənga lamba thləmə nyi. Ndə səbiya səmbəl wu tsa nda kəra Hyal nə nda.

³ Nda vər thlə na nə Musa, mafa Hyal ənga thlə na nə Zər Gaməu.

“Sər mələ gau, dədəgal nga nda gagadau ənga sə dədəgur nga nda,
Ya, Hyal Thlagəu Ndə Dəgal Dənəma!
Tandar ənga jiri ngə lagu ngau, təl nə ba'anəwa.

⁴ Wa ngə gərə hivər nga,
Thlagəu?

Wa ngə gərə dləvə dəgalkur nga?
Kəl nagə ngə ndə cicau.

Patər ndapi wu nda shili,
ndu sa dləvə ngau
arya thlər tsapəkur ngau a biyari ar babal.”

⁵ Ayukudə sə'yar kə patəu, təma, yi tsamə a dəməlməu, təma, kə yi lari ki Hyal ca ngə kwapatə nə sakida, papahau.

⁶ Sara vu ki Hyal kau, ngə waladi mədəfə ənga 6wa6watə mədəfə kə biya. Ndə hari kar lilinu kəra wu mbəl wilwiləu, ənga ndə thlə'ubiya hathla nda ənga takulagə əndzə dləbəu.

⁷ Pathlə wu pama sə ənga pi fodə ta, nə nyi anə waladi mədəfə ta əgwa əndzə mədəfə kəra nyinyi ənga hudə ndzəndzə nə Hyal ndəra a'yi ja ba'anəwa.

⁸ Ki Hyal kau, nyinyi nga nyi ənga 'yar kəra shida sara du kadakadarkur nə Hyal ənga dənəma nyi.

Ndə a'yi kəra wu sən gwu ki Hyal kə mai, kəl ma
ḡwaḡwatə waladi məḡfə kə joməya dzau.

16

*Əgwa Məḡfau Nyinyau Ənga Hudə Ndzəndzə Nə
Hyal*

¹ Təma, kə yi nggari vanyi ḡahə dzədzəgamə
sara wu ki Hyal kəra a vər na anə waladi məḡfə
'yar kau, “Ma'ya mau, hya biya pəna əgwa hudə
ndzəndzə Hyal məḡfə kau, a gyu duniya.”

² Kə waladi nə tanggərma kə biya, kə ji biya pəna
nə nya əgwa a gyu duniya. Kə mbəlgə pəziya dzə ar
dza njira ənga mətsamə nə sər tagə kau, ənga nda
vər dləvə sərə a papa nyi.

³ Minu nyi, təma waladi nə məthləkura nyi
shabiya əgwa nyi a gwar tsadau, təma 'yimi kəra
a gwa sha aga mashi ndə tətəu, ba sərə a gwagwa
kudə patəu.

⁴ Kə nə makərəkura nyi tsu biya, kə ji biya shabiya
nə nya əgwa a gu dəl'yar ənga mandəli'yar, kə 'yimi
kəra a gwa sha aga mashi.

⁵ Kə yi nggari waladi kəra ənga dənəma ar kəra
'yimi a vər na,

“Tsatsa'a ngə numa gau,
Nagə ndə cicau,
ndəra saya ḡa, naja ngə əshina,

⁶ Arya nja nyi a pənar nda mashi,
mashi nji cici gə Hyal ənga mashi nabi'yar.
Kəja ga nə ndari mashi aga nda sa,
akkəra nyi ngə kəja.”

⁷ Kə yi nggari dəhəu sara dar bagadiya nyi, a vər na,

“Hyal Thlagəu, ndə dəgal dənama!
Numa ngau, jijiri ənga tsatsa'a nga nyi.”

⁸ Kə waladi nə fodəkura nyi pəna əgwa nyi a dar pəci, kə ji cakər nyi dənama nə titi'wa nji ənga u'ur pəci.

⁹ Ndə titi'wanakər arya kwakwadəkura pəca nyi, ba ndə gu dida thləməər Hyal, ndəra ənga dənama ar kəra ɔwaɔwatə'yar kə patəu, ama kə ndə nggəl ara tubi ənga fal Hyal.

¹⁰ Waladi nə təfukura nyi pəna nə nya əgwa a dar tsəkafə nə sər tagə kau, təma, kə təlkur nyi hədiya dzə ənga kuthləu. Nji tsu nda vər də hira nda ara ɔwaɔwatəu.

¹¹ Ndə dumwa ənga dida Hyal arya ɔwaɔwatə kəra nda a gwa ənga shiləgə kəra ar dza nda, ama kə ndə nggəl ara tubi.

¹² Waladi nə kwakura nyi shabiya səra a gu əgwa nyi a gwu dəl dəgal Yifəratəsu, təma, kə 'yimi kəra a gwa shi'wau, aga təl'ya

r sara də wu səbiyar pəci uya lagur shida.

¹³ Kə yi lari mambəl dəmwə 'yi'yar makər kəra a papa bwanja, biya sara wu miya pabər vuwa kau, ənga sara wu miya sər tagə kau, ba ənga sara wu miya nabi fati.

¹⁴ Nanda mambəl dəmwə 'yi'yar ngau, kəra a vər məl sə dədəgur. Nda vər biya aga nda ma'yi a ndəra təltəl'yar nə patər duniya, aga nda tsəmiya dzə aga sa pa ar pəci dəgal nə Hyal Dəgal Dənama.

¹⁵ Hya dəngari sərə Yesu nana, abər, “Kəja ya vər shili ənggər ndər həl! Ndər barka ngə ndəra pabər kərnyı ju vər səkə shili də ənga ji hari kari nyi caməu, ara ja sara nggya turusu, nja lari tursukura ja.”

¹⁶ Təma, kə ndə tsəmiya təl təl'yar kə patə a shili ar vi zəməu, vira nju ngga ənga miya njir Yahudiya Amagidanu.

¹⁷ Waladi nə mədəfəkura nyi shabiya sərə gu əgwa nyi a dəməlmau. Kə dəhə dzədzəgaməu, hya'ari sara ndar tsəkafə wu ki Hyal ju na, “A dəri!”

¹⁸ Kə səm par ənga dəraghi par ənga dlədə par ənga madiya kənggəder 'yi'yi kərə gərə saya də ənggərə ndə shili wu duniya. Kənggədə kau, madiya madiya kənggəder 'yi'yi ngau.

¹⁹ Najaka madiya məlmau, ba ji təkəbiya dzə bwata makəru, kə madiya məlmə nə 'yi'yi paməpamə dlanakər. Kə Hyal dəngari ənga Babilanu madiya məlmau, ba Hyal nə nyi kyakiwa nyinyau ənga hudə ndzəndzə nə Hyal aga ja sa.

²⁰ Kalar dzəgu dəl sanakər ənga kalar mə'yar sanakər, nji a'yi bəra lar nda mai.

²¹ Sara dəməlmau, kə madiya mətəndili tətəfau a shidar kərə nji. Kə ndə dzəgwa dida Hyal arya bwaḃwatə nə mətəndili kau. Bwabwata nyi dzadzau gagaḃau.

17

Madiya Zawar Ənga Sər Tagəu

¹ Kə pathlə wu pama waladi mədəfə kərə nda ənga əgwa mədəfə ta, shida ara yau, kə ji nar də, “A ndau, aga ya sa canə ngə bwaḃwatə kərə nju

nda ləri anə madiya zavar kəra a vər nggya ar kəra 'yimi kəra gangəu.

² Naja ngə ndəra təl'yar nə duniya məl səsukur ənga ja. Njir duniya patə a nyir nda ənga səsukur nyi ənggər njira padlə wu tsa nda.”

³ Kə waladi ta hər də wu mambəl a ndar tagə mashi, a ndəna təma, kə yi lari vanyi mala a vər nggya ar sər tagə dəzəu. Sər tagə kau, a'yi ja ənga thləmə nə dida Hyal tsətsəfə ar dza ja. A'yi ja tsu ənga kər mədəfau ənga tələmə kumou.

⁴ Mala kə hari kar dədla dədla ənga maggədi maggədi, ənga ji hari əndzə kəra wu mbəl, ənga tsəka dədur ba ənga handzəlkwa. Tasau əndzə ngu tsa ja, nyinyau ənga kalar sərə gərə cicau ənga sər məl səsukur nyi.

⁵ Kəja thləmə dədəwa kəra tsətsəfə ar hudəma ja:

“Babilanu madiya məlmau

Məya zavar'yar

Ənga sə zhizhigər'yar nə duniya.”

⁶ A lari yi mala kə a nyir ja nyi papadlau, ənga mashi nji cici gə Hyal, mashi njira ləri sakida ar kəra Yesu.

Ta yi lari nyi ba də sər dədəgur anə də.

⁷ Kə waladi na anə də, “Ara mi sə kə də sə dədəgur anə nga? Yu cabiya ngə sərə ar dəwa ar kəra mala kau, ənga sər tagə kəra ja vər dlə kau, kəra ənga kər mədəfau ba ənga tələmə kumou.

⁸ Sər tagə kəra gə lari ta, a'yi ja dədəməu, ama tsu ja a'yi mai. Ju nda biya sara wu ka'u kəra nji gərə sən təkəna ba ja ma'yi a ndar vira nju nda tsəya nyi ari. Njira vər nggya wu duniya, njira gərə ənga thləmə nda tsətsəfə wu ləkakadə nə pi, mbari ar

dzəguya duniya wu nda da sə dədəgur anə nda, ma ndə lar sər tagə kau, kəra a'yi dədəm ama tsu ja a'yi mai ama tsu ju bəra nda sha shili.

⁹ “Sə kau, wu gal hahangəkər, Kər mədəfə kau, madzəgamə mədəfə ngau, kəra mala kə a vər nggya a dari.

¹⁰ Nanda tsu ar viya təl'yar mədəfə ngau. Təfwa nda a dlanar nda kər, tsu pathla nda vər səm təlkur, ənga pathla nda tsu ji gəra shili, ama ma ji nda shili, ju sa səm təlkur nə pəci kushu.

¹¹ Sər tagə kəra a'yi dədəməu, ama a'yi ja tsu mai, naja ngə təl nə cisəkura nyi. Pathlə ja wu pama nda mədəfə kau, ənga ja vər mə'yi a ndar vira nju nda tsiya nyi ari.

¹² “Tələmə'yar kə kumo kə gə lari kau, nanda ngə təl'yar kumou kəra gəra dləwuri vir səm təlkur nda kwatahəu, ama ndu nda dləwuri zəwa təlkur nə saka pathlə dəbə ənga sər tagə kau.

¹³ Təl'yar kau, dəngər nda zəmə nga nyi, dənamar nda patə ənga səm təlkur nda ndu nda nə nyi anə sər tagə kau.

¹⁴ Ndu nda par pa ənga Zər Gamə kau, ama ba Zər Gamə kə a səmkur təlkur ar kəra nda ari naja ngə Thlagər thlagə'yar ənga Tələr təl'yar, ənga njira a'yi əkkə'yi ja, nanda ngə njira nji ngga, ənga njira nji cadəbiya ənga njir nu kəra ji fər kər əni.”

¹⁵ Təma, kə waladi kə na anə da, “Yimi kəra gə lar ta, vira mala zawar ta a vər nggya ari ta, nanda ngə nji ənga dlamir nji ənga 'yi'yi 'yi'yi 'yar ba ənga miya pampaməu.

¹⁶ Sər tagə ənga tələmə kumo kəra gə lari ta, ndu nda piyari shishir dza zawar kau. Ndu nda fadiya

kar nyi ba nda piyari nyi turusu. Ndu nda dəhu kumər dza ja ba nda nggyina sərə hyau ənga u'u.

¹⁷ Arya Hyal nə nda dəfu aga nda nyabiya sərə ju yiwu lagur məliya aga nda nə nyi dənamar nda anə sər tagə kau, aga ja səm təlkur, kəl pəcira ndər Hyal wu nda nyabiya dzau.

¹⁸ Mala ta gə lari ta naja ngə madiya məlmə kəra a vər səm təlkur ar kəra təl'yar nə duniya.”

18

Dla Nə Məlmə Babilanu

¹ Ayukuda sə'yar kə patəu, ba yi lari vanyi waladi a vər shida sara a dəməlməu. A'yi ja ənga dənəma nə səm təlkur, ənga kadakadarkur nyi a vər mbəl ar kəra duniya patəu.

² Ji ngga ənga dəhə dəgaləu, ji na,

“A dlar ja, madiya Babilanu a dlari!

A dər ja vir nggya anə mambəl dəmwa'yi'yar pampaməu,

Ənga vir nggya anə kalar mambəl diyadiyaḅə'yar,
ənga vir nggya anə 'yagə dəgur ənga
diyadiyaḅə'yar,
ənga vir nggya anə kalar sər tagəu, kəra dəgur
ənga diyadiyaḅəu.

³ Ara patər 'yi'yi ndə wathliya dzau
wu nggyabiya nə səsukur nyi.

Təl'yar nə duniya patə a məliyar nda səsukur ənga
ja.

Njir shafəli a məliyar nda gənnə wu ja
lagur yiwu nggyabiya wawahə nyi.”

⁴ Kə yi ǝəra nggari vanyi dāhə sara a dəməlmə a vər na,

“Biya mau, nahyi nji dā, sara wu ja!

Ara hya sara gu bikə nyi

ara ǝwaǝwatə nyi a sara uya hyi.

⁵ Ara bikə nyi a vuyar dzə ba a dəməlməu.

Kə Hyal dəngari ənga bikə nyi.

⁶ Məliya nya mau ənggər kəra ji məliya.

Kibiya nya mau aga məthləu səra ji məliya.

Wathliya nya mau aga məthləu kyakiwa
dəmwa'yikur kəra ji wathliya hyi a gwa.

⁷ Nə nya mə ǝwaǝwatə ənga hüdə kyakyaru
ənggər kəra ji hana kərnyi ənga nggya wawahə
nyi.

Wu dəfuwa ja, ja vər ǝwakər nyi,

‘Yi wu nggya ənggər kwatam, a'yi yi mala təsal
mai,

ənga a'yi yiwu sə'yinggu mai.’

⁸ Agabangau, wu pəci pathləu ǝwaǝwatə wu nda
nyabiya dzau,

tau, ənga sə'yinggu ba wuǝau.

U'u wu nda nggyina nyi,

arya Hyal Thlagəu ndə dəgal dənəma ngu sa
thlana nyi numa.”

⁹ Ma təl 'yar nə duniya kəra məl səsukur ənga
nggyabiya wawahə nyi ənga nda lari 'yar nə u'u
kəra wu nggyi nyi, ndu nda tiwi ənga sə'yinggu nyi.

¹⁰ Maja wu ǝwaǝwatəu, ndu ta'yi tsaləu ara ndu
hivər nja sara dāǝər nda wu ǝwaǝwatə nyi, ənga
ndu tiwi nyi.

“Sər təhudəu! Sər təhudəu, madiya məlməu,

Babilanu, məlmə kəra ənga dənəma!

Wu saka pathləu numa ngau a shiliri!”

¹¹ Njir shafəli nə duniya wu nda tiwi ənga jiga tiwi arya ja, ara tsu ndər nda dəl kar nda a'yi mai.

¹² Tsu ndər nda dəl əndzau, ənga thladla ənga tsəka dəduru ənga handzəlkwa ənga yadi lilinu ənga yadi dədla dədla ənga yadi pərapəradəu ba ənga kar maggədi maggədi, patə əkkə'yi alenyi wu la ki ənga alenyi sə kəra nji məliya sara wu hira ciwar ənga wu dəduru ənga liyangə shishi'wu ba alenyi liyangə ənga tsəka pəzi mai.

¹³ Ətsu ndər nda dəl kar nə sə kisəu ənga yaji ənga sər dəzə huda umbwa ənga burdi dza wu ənga burdi dədəgau ənga 'yimir wur inabi ənga mal wur zaitunu ənga əpou ənga uhi, ənga thla ənga təmahəu ənga tagu ənga keki tagəu ənga mafa'yar ba ənga alenyi nji a'yi mai.

¹⁴ Ndu na anə nyi, “Kalar sə mənəhəu, kəra gu cim a tərəbiyari, tsu gu bəra uya nda mai. Patər bərbakur ngau a tərəbiyari, tsu gu bəra nda uya mai.”

¹⁵ Njir shafəli kəra dəl na nyi sə'yar kə uya əkkəri a gu bərbakur nyi ndu nda ta'yi tsaləu, ara ndu hivər nja sara da bər nda wu bwa bwatə nyi. Ndu tiwi ndu sə'yinggu,

¹⁶ ndu wau, ndu na,

“ Sər təhudəu! Sər təhudəu, madiya məlmau, ndəra dədəməu, a vər mba kadəmbul lilinu ənga ləgutə dədla dədla ənga ləgutə maggədi maggədi.

Ndəra dədəməu, a vər ha əndzə wilwilu ənga tsəka dəduru ba ənga handzəlkwa.

¹⁷ Wu saka pathləu kalar bərbakur nyi kau wu nda sa!’

“Kalar njir dlə kwambwal, ənga njira wu bə a gwa, ənga njir məl thlər a gwu nda ənga kalar njira vər məl gənnar nda a gwar 'yimi, ndu nda ta'yi tsatsaləu.

¹⁸ Ma ndə lari 'yar u'u kəra a vər nggyi nyi, ndu səya mala wau, “Məlmə a'yi saya də dəgala abangə nga nyi ya?”

¹⁹ Ndu nda təwa 'yi'yi wu kəra nda, ndu tiwi ənga jiga tiwi, ndu na,

“Sər təhudəu, madiya məlmau,
vira njira ənga kwambwal ar tsadau,
ənga ndə məliya gənnə lagur bərbakur nyi!
Wu saka pathləu, kəja nja sana nyi ri!

²⁰ Caguli mau ar kəra ja, dəməlmau!

Caguli mau nji cici gə Hyal ənga cama səsə'yar
bə ənga nabi'yar!
Hyal a cabiya nyi ri numa nə shishikur nyi kəra ji
məl anə hyi.' ”

²¹ Kə madiya waladi həri vanyi madiya tsəka kəra ənggər bəra, kə ji vakuwa a gwar tsadau, kə ji na,

“Ənga gwazhi vi ənggər kau, ngə
madiya məlmə Babilanu, nga nju nda vakana
nyi a gya,
tsu nju bəra lari nyi mai.

²² Njir tsa səmbəl əkkə'yi njir thlə na ənga njir mbidə
mbəla'wu, ənga aligata

a'yi kəra nju bəra nggari wu gə mai.
Ndə a'yi kəra wu bəra məl thlər tsi
kəra a'yi nju uya wu gə mai.

Dahə nə au ar bəra
nju bəra nggari wu gə mai.

²³ Tsu nju bəra lari mbəmbəl nə pitəlla wu gə mai.

Daha sal kwanjili ənga kwanjili
nju bəra nggari wu gə mai.
Njir sugu ngau, ca ngə nji nggunggurəm nə
duniya.
Lagur shavi ngau, nga gə nggutana 'yi'yir
duniya.
²⁴ A gu ja ngə mashi nabi'yar ənga nə nji cici gə
Hyal,
ənga kalar njira nji tsəya wu duniya.”

19

Fal Hyal A Dəməlmau!

¹ Ayukuda kau, təma, kə yi nggari vanyi dāhə a
papa dāha dlamir nju wau a dəməlmau, a vər na,
“Fal Hyal!

Mbədau ənga kadakadarkur ənga dənama a
nggyari anə Hyalər mən,

² aya jiri ənga tsatsa'a ngə numa nyi.

A thlana nyir ja numa anə madiya zawar ta
ndəra diyaḃəna duniya ənga səsukur nyi.

A kibiyar ja ar ja mashi mafa nyi kəra nji tsəya.”

³ Wayu kə ndə bəra wau, ndə na,

“Fal Hyal!

'Yar kəra a vər biya wu ja vər dəzə a dəməlmə
ba'anuwa.”

⁴ Njira nggurəm məthləkumunyi apə fəḃəu ənga sə
ənga pi fəḃə ta dla a gyu mwar Hyal ndu dləvə nyi,
naja kəra a vər nggya ar tsəkafəu. Ndu dzəgwa tiwi,
ndu na,

“Amina, Fal Hyal!”

⁵ Kə dāhə hya'ari sara ar tsəkafəu, kə ji na,
“Fal Hyalər mən,

nahyi mafa nyi patəu,
nahyi njira vər hivər nyi,
nji dədəgal əkkə'yi njira kukushu!"

⁶ Kə yi nggar vanyi dāhə a papa dāha dlamir nji,
dāhə ənggər dəl shida shida, ənggər dāha madiya
dlədər par, a vər wau,
“Fal Hyal!

Arya Hyal Thlagər mən Ndə Dəgal Dənama a
vər səm təlkur.

⁷ Ta'yi mənə caguli mənə dā ənga hufə pipida
mənə nə nyi kadakadarkur!

Arya hədzau nə Zər Gamə kau, a shiliri,
kwanjili nyi a bathləri dzau.

⁸ Lilinu mbəmbəl camə
nga nji nə nyi aga ja hari.”

(Lilinu mbəmbəl camə ngə cabiya sər mələ nji cici
gə Hyal kəra tsapəu.)

⁹ Kə waladi kə nar dā, “Tsəfəya, ‘Barka anə njira
nji nggəya aga mini hədzə nə Zər Gamə kau!’ ” Ji
bəra cakəri na, “Najakə ngə ndər Hyal kəra jijiri.”

¹⁰ Ta yi nggari abangau, təma, kə yi dla a gyu
hufə nyi, aga ya dləvə nyi. Ama kə ji na anə dā,
“A sara ga məl abangə mai! Ndə nga yi ənggər
nagau, ndər məl thlər kuvwar ngau ba ənga zamər
hyi kəra ləri sakida ar kəra Yesu. Dləvə Hyal! Arya
ləri sakida ar kəra Yesu ca ngə ndərhaha.”

Ndər Dlə Tagu Pərtəu

¹¹ Kə yi ləri dəməlmau papahau, ənga a dumwa
dā vanyi tagu pərtəu, kəra ndər dla nyi nju ngga nyi
ənga Ndəra nju fər kər ni ənga Ndə jijiri. Ənga ju məl
numa tsatsa'a ənga pa tsatsa'a.

¹² Liya ja ənggər kyara u'u. A du kəra ja ngə dora nə təlkur gangəu. Thləmə a'yi kəra tsətsəfau ar ja, kəra ndə gəra səni kəl naja.

¹³ Kar kəra ar dza ja dzədzəgu nga nyi ənga mashi. Thləmə nyi ca ngə Ndər Hyal.

¹⁴ Soja'yar kəra a dəməlmau a vər nu nyi, ar tagu pəpərtəu, ənga ndə hari lilinu pərtə camə mənəhəu.

¹⁵ Sara vu miya ja ngə vanyi katsakər səsəm wu biya aga dliya duniya nə 'yi'yi pampaməu. “Ju səm təlkur ənga zəwa liyangəu.” Ju nda ghighirabəna vir bəci 'yimi wur inabi nə hudə ndzəndzə nə Hyal, Ndə Dəgal Dənəma.

¹⁶ Ar ləgutə nyi ənga ar 'ya ja thləmə a'yi tsətsəfau:

Təl nə təl'yar ənga Thlagə nə thlagə'yar.

¹⁷ Kə yi lari vanyi waladi ta'yi a dar pəci, ju ngga ənga dəhə dzədzəgamə anə kalar 'yagə'yar kəra a vər mau, “Shila mau, hya kəbiya dzə ənggau aga madiya səm sər səm nə Hyal.

¹⁸ Hya sa səm kumər dza təl'yar ənga madiya soja'yar ənga madiya nji ənga tagu'yar ənga njir dlə nda ənga kumər nji patəu, mafa ənga kambər nji, nji dədəgal ənga nji kukushu.”

¹⁹ Kə yi lari sər tagə ta ənga təl'yar nə duniya ənga njir par nda kəbiya dzə aga pa ndər dlə tagu kau ənga soja nyi'yar.

²⁰ Ama kə ji mbari sər tagə kau ənga nabi fati kəra a vər məl sə dədəgur wu thləmə nyi. Ənga sə dədəgur kəra ji məl kau, ənga ji nggutana njira dləwuri mətsamə nə sər tagə kau, ənga ndə dləvə sərə a papa nyi. Gyapə nda nga nji vakuwa a gu fa'a u'ur kətsa kəra pərtə pwahəu wu shuni ənga pi.

²¹ Aleniyi njira hyau, kə ndər dlə tagu kau, tsəya nda ənga katsakər kəra wu biya sara wu miya ja. Patər 'yagə'yar kaḃiya dzə aga nda sa nyabiya dzau ənga kumər dza nda.

20

Fa Duburam

¹ Ba yi lari vanyi waladi sara a dəməlmə a vər shida ənga sər pahə miya ka'u kəra nji gəra sən təkəna ənga əpa nə liyangə wu tsa ja.

² Kə ji mbari pabər vuwa ta, naja ngə pabə dədəmə ta, naja ngə təl nə mambəl dəmwa'yi'yar kəra nju ngga ənga Shatan, ba ji mbiya nyi ənga əpa liyangə nə fa duburam.

³ Ji vakuwa nyi a gyu ka'u dzəgam gagadə ta ba ji hədiya, təma, kə ji dzəgwa kuḃələri ba ji fər mətəmə ari aga ja kari nyi ara bəra ngguta nji kəl ma fa duburam kə tərabiya. Ayukuda kau, nju bəra siya nyi nə pəci kushu.

⁴ Ba yi lari tsəkafə'yar ənga njira vər nggya ar nda, nji nə nda dənəma nə təlkur aga nda numa anə duniya. Kə yi lari mambəl njira nji thlana kəra nda ari sakidar nda ar kəra Yesu ənga ndər Hyal. Nanda a'yi dləvə sər tagə kə mai ənga səra wu papa nyi mai, ənga nandə dləwuri mətəmə nyi ar hədəma nda alaga ar tsa nda mai. Ndu bəra də a'yi ənga pi ba nda səm təlkur ənga Kərsiti nə fa duburam.

⁵ Aleniyi nji tətə wu bəra shili wu pi mai kəl ma fa duburam kə kudau. Najakə ngə hya'ari sara vər tə nə tanggərma.

⁶ Barka ənga cicikur anə njira uya hya'ari sara vər tə nə tanggərma, ari tə nə məthləkura nyi a'yi

ənga dənama ar kəra nda mai. Ndu da pubu'yar nə Hyal ənga nə Kərsiti, ndu səm təlkur ənga ja nə fa duburam.

A Ndiyar Nji Dənama Shatan

⁷ Ayukuda fa duburam kau, nju nda siya Shatan sara ar vira nji mbiya nyi ari.

⁸ Ba ja biya ma'yi a nda ngguta nju huda duniya ənga dəla duniya patəu. Ju tsəmiya Gogu ənga Magogu aga nda sa pa. Gangəkura nda ndu da ənggər məshi'wa nə miya dəl.

⁹ Ndə ɓau, ba ndə zəwari miya cira duniya patəu, ənga ndə zəwar məlmə kəra Hyal wu yiwu, ca ngə kaɓə nji gə Hyal wu kwapatəu. Ama kə u'u shida sara dəməlməu ba ji sa səmku nda.

¹⁰ Shatan kəra nggutana nda ba nja vakuwa nyi a gu fa'a nə u'ur kətsa kəra pərtə pwahəu wu shuni, vira nji vakuwa sər tagə ənga nabi fati ta a gwa gwa. Nju nda nə nda ɓwaɓwatə vu'yi ənga pəci ba'anuwa.

Numa Nji Tətau

¹¹ Təma, kə yi lari madiya tsəkafə pərtəu ənga ndəra vər nggya a dari. Dəməlməu ənga gyiwu 'yi wu hwi ara ja, tsu vir nggya a'yi ara nda mai.

¹² Kə yi lari njira kudau, nji yidədəu ənga nji nggunggurəm tata'yi wu mwar tsəkafa nyi. Kə nji pahəna ləkakadə'yar. Kə nji ɓəra pahəna vanyi ləkakadəu, ca ngə ləkakadə nə pi. Nji məliya nyi numa anə njira kudau tsa'a aga səra mələ nda wu pəci kəra nda wu duniya ənggər kəra nji tsəfəya a gu ləkakadə'yar kau.

¹³ Kə tsadə ləri njira kudau wu nda ba tau ənga nji gə mambəl tsu ləri njira tau wu nda. Kə kalar ndə, nju məliya nyi numa tsa'a aga səra ji məliya.

¹⁴ Kə tau ənga nji gə mambəl kə nji vakuwa nda a gu fa'a nə u'ur kətsa ca ngə tə nə məthləkura nyi.

¹⁵ Kalar ndəra nji gəra uya thləmə nyi wu ləkakadə nə pi kau, ba nja vakuwa nyi a gu fa'a nə u'ur kətsa.

21

Urshalima Mafəliyangəu

¹ Kə yi lari dəməlmə mafəliyangə ənga gyiwu 'yi mafəliyangəu, arya dəməlmə ənga gyiwu 'yi nə tanggərma a tərabiya, tsu tsadu a'yi tsu mai.

² Kə yi lari Məlmə Cicau, Urshalima mafəliyangə a vər shida sara a dəməlmau, sara dara Hyal ənggər kwanjili kəra bathlər dzə mənəhəu aga səkə salk-wanjili.

³ Kə yi nggari vanyi dəhə dzədzəgaməu sara dar tsəkafə kau, wu na, “Vir nggya Hyal a dəri əkkə'yi nji, ju nggya əkkə'yi nda, ndu də nji nyi ba Hyal ənga kərnyi wu nggya əkkə'yi nda ba ja də Hyalər nda.

⁴ Ju nda dana nda sələm wu liya nda. Tsu nju bəra tə mai, sə'yinggu a'yi alaga tiwi ənga kwakwadəkur nggyabiya a'yi mai, ara sə dədəmə a tərabiya.”

⁵ Ndəra vər nggya ar tsəkafə kə na, “Kəja ya vər məl kalar sə ja də mafəliyangəu!” Kə ji bəra na, “Tsəfəya sə'yar kə patəu, arya sə'yar kə gu sən fər kər ənga nda ənga jiri nga nda.”

⁶ Kə ji nar da, “A dāri. Nayi ngə Aləfa ənga Omega, Dzəguya ənga Kudīya. Anə ndəra ənga hili yu nə nyi 'yimir sa kurthləu, sara a vu mandəli 'yimi nə pi.

⁷ Ndəra səmku təlkur ju da ndər fa'a ki da. Ba ya da Hyal nyi ənga ba ja da zər da.

⁸ Ama njir hivər ənga njira gəra hənggəri ənga njir məl sə dedəbəu ənga njir tsa ndau ənga nji səsu ənga njir pipitima ənga njir nu katəu ba ənga njir fati, vir nggyar nda wu nda da wu fa'a nə u'ur kətsa kəra pərtə pwahəu wu shuni. Najakə ngə tə nə məthləkura nyi.”

⁹ Pathlə wu pama waladi'yar mədəfə ta kəra ənga əgwa mədəfə nyinyi ənga bwaḃwatə mədəfə shida ka sa na anə da. “Shili, yu canə ngə kwanjila nyi, mala Zər Gamə kau.”

¹⁰ Kə ji həri da wu mambəl a dar vanyi madiya mə dzəgaməu, kə ji canə da Urshalima Məlmə Cici kau, a vər shida sara a dəməlmau sara dara Hyal.

¹¹ Ju mbəl ənga kadakadarkur nə Hyal, ju mbəl ənggər tsəka dudur kəra wu mbəl ənggər doragalu.

¹² A'yi ja ənga madiya mahwal dzəgam kəra zəwuya nyi ənga miyar gwa kumo apə məthləu ənga waladi'yar kumo apə məthləu ənga ar kalar miyar gwa waladi pathləu. Ar kalar miyar gwa kau, nji tsəfəya thləmər culi nə njir Izirayila pathlə pathləu.

¹³ Miyar gwa makər a də Səbiyar Pəci ənga miyar gwa makər a yi Gya Vuya ənga miyar gwa makər a gwa Də Fwahəu ənga miyar gwa makər a yi Gwa Tədə Pəci.

¹⁴ Nji həriya mahwal kau ar fəhi nə tsəka kumo apə məthləu, ar tsəka fəhi kau nga nji tsəfəya thləmər cama səsə'yar kumo apə məthlə nə Zər Gaməu.

¹⁵ Waladi kəra ndər anə də kau, sər təkə sə a'yi ara ja nə əndzə aga ja təkəri məlmə kau ənga miyar gwa ba ənga mahwala nyi.

¹⁶ Məlmə kau, tugukura nyi ənga dlaḅəkura ja ghəragə nga nyi. Ji təkəri ənga sər təkə sə nyi, tugukura nyi melu 1,400 ənga dzəgaməkura nyi ba ənga dlaḅəkura nyi abangə tsu.

¹⁷ Dzəgaməkura mahwala nyi a kari hi 200, sər təkə sə nə nji kəra waladi kə a vər təkə sə əni.

¹⁸ Nji həriya mahwal kau ənga tsəka jaspə ənga məlma nyi nji həriya ənga əndzau, kəra camə ənggər kwalaba.

¹⁹ Fə hiya mahwal kə nji ɓathləri ənga kalar tsəka duduru. Nə tanggərma tsəka jaspə ənga nə məthləkura nyi tsəka safayasu ənga nə makərkura nyi tsəka kalsidoni ənga nə fədəkura nyi tsəka imi-rələdu

²⁰ ənga nə təfukura nyi tsəka sardonisu ənga nə kwakura nyi tsəka karneliyanu ənga nə mədəfəkura nyi tsəka kərisolatu ənga nə cisəkura nyi tsəka bəryalu ənga nə ədləkura nyi tsəka topasu ənga nə kumokura nyi tsəka krisofəresu ənga nə kumo asərtəngəkura nyi tsəka jasinthləu ba ənga nə kumo apə məthləkura nyi tsəka amithliyasu.

²¹ Miyar gwa kumo apə məthlə kau, ca ngə handzəlkwa kumo apə məthləu. Kalar miyar gwa kau, nju məliya nyi ənga handzəlkwa pathləu. Lagu dədəgal nə huḍa məlmə kau, nji məliya nda ənga 'yimir əndzau, kəra wu mbəl wilwilu ənggər kwalaba.

²² Nayi a'yi lar ki Hyal wu məlmə kə mai, arya Hyal Ndə Dəgal Dənəma ənga Zər Gamə nanda ngə ki Hyal nə məlmə kau.

²³ Məlmə kə a'yi wu yiwu pəci ənga hya nda mbəl a gya gwa mai arya kadakadarkur nə Hyal ənga kəryi ngu lə mbəmbəl anə nyi ənga Zər Gamə tsu naja ngə pitəlla nyi.

²⁴ Ənga mbəmbəl nyi ngə njir duniya wu nda bər nda ənga təl'yar nə duniya wu nda shili ənga dlədləvəkur nda a vuwa gwa.

²⁵ Pəci a'yi kəra nju nda hədiya miya miyar gwa'yar nə məlmə kə mai, ara vu'yi a'yi a ndəna mai.

²⁶ Nju nda shili ənga kadakadarkur ənga dlədləvəkur nə njir duniya a vu məlmə kau.

²⁷ Sa'yi kəra gəra cicau, kəra wu nda gwa gwa mai, alaga ndər məl sə gəra səli ənga ndər ngguta nju nda gwagwa mai, kəl njira nji tsəfəya thləmər nda wu ləkakadə pi nə Zər Gaməu.

22

Dəl 'Yimi Nə Pi

¹ Kə waladi kə canə də dəl nə 'yimi nə pi, kəra wu mbəl wilwilu ənggər doragaləu, kəra a vər huhwi sara dar tsəkafə nə Hyal ənga nə Zər Gamə

² a gyar hada lagu nə hada məlmau. Wu nə pi kau, dadakə ngə nggilanga ja ar ghimbila dəl kau. Wu kau, wu ya yayar wu kumo apə məthlə wu fa, ju ya wazha kalar hya. Hyali wu kau kundzəgə ngau aga shiləgə 'yi'yi pampaməu.

³ Tsu shi'wu nə Hyal wu bəra də wu məlmə kə mai. Tsəkafə nə Hyal ənga nə Zər Gamə wu nda də wu məlmə kau. Njir məl thlər nyi wu nda dləvə nyi.

⁴ Ndu nda lari bama ja. Thləmə nyi tsu wu nda də tsətsəfə ar hüdəma nda.

⁵ Tsu vu'yi wu nda da mai. Tsu nju bəra nda yiwu vanyi mbəmbəl pitəlla alaga mbəl pəci kəra wu shili ənga mbəmbəl mai, arya Hyal ənga kərnyı ngu nda da mbəmbəl anə nda. Ndu nda səm təlkur ba'anuwa.

⁶ Kə waladi kə nar da, “Ndər kau, ndər kəra ndu sən fər kər əni ngau ənga ndər jiri ngau. Hyal Thlagəu, thlagər mambəl'yar nə nabi'yar, ngə səwa waladi nyi aga ja cabiya anə njir məl thlər nyi sərə wu nda da kajangəkau.”

Yesu A vər Shida

⁷ “Nggara mau, kəja ya vər shida kajangəkau! Barka anə ndəra bəlari ndərhaha kau, kəra wu ləkakadə kau.”

⁸ Nayi Yahwana, Nayi ngə nggari ənga lari sə'yar kau. Ama ta yi lari, kə yi nggari, kə yi bəliya undi aga ya dləvə waladi kəra canə da sə'yar kau.

⁹ Ama kə ji nar da, “Ga sara məl abangə mai! Nayi ndər məl thlər kuvwar hyi ngau, nagə ənga zamə ngə'yar nabi'yar ənga kalar njira bəlari ndər ləkakadə kau. Ga dləvə Hyal!”

¹⁰ Kə ji nar da, “Ga sara ghidəna ndər nə ndərhaha nə ləkakadə kə mai, arya pəci a dərı ləhəu.

¹¹ Ta'yi njir məl sə dəmwa'yu nda dumwa ənga məl sə dəmwa'yir nda, njir məl sə gərə tsatsa'a tsu nda dumwa ənga məl sərə gərə tsatsa'a, njir məl sə tsapəu nda dumwa ənga məl sərə tsapəu, nji cicau nda dumwa ənga məl sərə cicau.”

¹² “Nggara mau, kəja ya vər shili kajangəkau! Akkəri da a'yi ənga yau, ba ya nda nə nyi anə kalar ndə tsa'a aga sər məla ja.

13 Nayi ngə Aləfa ənga Omega, Tanggərma ənga Jomə ndəl, Dzəguya ənga Kudiya.

14 “Barka anə njira cina kar har nda aga nda uya lagur səm Wu Nə Pi, ba nda gwu huda məlmə lagu miyar gwa.

15 Abiya ngə hya'yar ənga njir pipitima ənga nji səsu ənga njir tsa ndau ənga njir nu katəu ba ənga kalar njir yiwu fati ənga məl thlər fati.

16 “Nayi Yesu, a səwari yi waladi də aga ja nə ngə sakida kau aga ga nə nyi anə dəbər njir nu. Nayi ngə culi ənga nggyilanga Dawuda ənga nayi ngə shashilga vəlang.”

17 Mambəl ənga kwanjili kə na, “Shila mau!” Kalar ndəra nggar də, ta'yi ja na, “Shila mau!” Kalar ndəra ənga hili, ta'yi ja shili ənga kalar ndəra wu yiwu aga ja uya 'yimi nə pi, bəgə ja dləwuri kurthləu.

18 Yu tədə himiya kalar ndəra wu nggar ndər nə ləkakadə ndərhaha kau, ma ndəra cəkəri a dəgəri, Hyal wu nda cəkər nyi ɓwaɓwatə kəra Hyal nana wu ləkakadə nyi kau.

19 Ma ndəra gənna ndər sara wu ləkakadə nə ndərhaha kau, Hyal wu nda həbiya nə nya nubwa nə məsahəkər sara wu wu nə pi ənga sara wu məlmə cici nə Hyal, ənggər kəra nji tsəfəri wu ləkakadə kau.

20 Ndəra lər sakida sə'yar kə na, “Angə, ya vər shili kajangəkau.”

Amina, Shili, Thlagə Yesu.

21 Ta'yi mayiwakur nə Thlagə Yesu a nggya əkkə'yi nji cici gə Hyal patəu. Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95